

劉賓客集

冊二



劉賓客文集卷第十一

表章一

為淮南杜相公
佑脩凡十首

讓同平章事表

謝平章事表

謝手詔表

詔後敕
親批

謝貸錢物表

請赴行營表

謝兵馬使朱鄭等官表

賀復吳少誠官爵表

賀除虔王等表

慰義陽公主薨表

慰王太尉薨表

讓同平章事表

臣某言高品吳千金至奉制加臣銀青光祿大夫同中書門下平章事兼徐泗濠等州節度觀察處置等使餘如故者初受恩榮若登霄漢退思塵忝如履春冰臣誠惶誠恐頓首頓首臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯報政之能愧無可稱以答高位豈意聖慈弘獎天澤薦加以燮贊之崇名被庸虛之陋質懼速官謗有玷大猷伏以宰相之職安危是注其在當否繫於慘舒惟以材升例無平進舉不失德則副蒼生之心苟非其人或致外夷之哂臣雖愚昧嘗覽前言豈敢冒榮遂安竊位輒思事理冀盡芻蕘若以汴河要津漕運所切徐方俶擾師旅未寧謹當上稟叡謀下貞戎律克期而進屈指可平勵衆之先是臣之志旣行其事必在正名所加節制安敢飾讓至於銀青貴服金鉉重名勲績無聞豈宜濫及伏乞賜寢前命俯亮愚衷微臣遂知止之宜聖朝無不稱之服名器斯慎退讓有聞遐邇聆風孰不知勸其新授官告謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷味死陳讓再奉嚴旨不令固辭恩厚命
輕位高責重中謝臣聞天下安危注意將相處論道具瞻之地當總戎作鎮之權
雖協夢而求無聞秉鉞之寄登壇以拜不兼調鼎之榮授受惟艱伊昔猶爾況
臣庸瑣何以克堪陛下玄造曲成大明私照俾掌戎律復參廟謨寵光之崇在
臣已極毫髮之效於國何施謹當罄竭微誠奉遵至教仗天威以懾不類敷聖
澤以遂羣生上分旰食之憂下塞素餐之責力誠不足心實念茲伏乞皇明俯
賜照鑒臣恪居官次遐守藩維不獲伏謝彤庭陳露丹慊心存闕下同犬馬之
戀恩身在淮潛仰雲天而結思無任懇悃屏營之至

謝手詔表

詔後批云
朕自書

臣某言中使閻忠信至奉宣聖旨存問兼賜臣手詔拜捧紫泥跪伸金簡承旨
見聖神之略感恩知身命之輕中謝臣素乏異能幸逢昌運猥當旄鉞之寄未靖
祇氛榮分台鼎之名何階啓沃竊位斯久速尤是虞豈謂玄化曲成鴻私薦及
特紉睿思親灑仙毫降自九重粲然五色初喜麗天之象遠燭輝光旋驚垂露

之蹤曲覃霈澤鸞鳳騫翔而變態煙雲舒卷以呈姿賦彩飛文聳神蕩目恭惟國寶何幸家藏感極涕零莫知上答應緣軍旅庶務謹具別狀奏聞無任欣戴屏營之至

謝貸錢物表

臣某言中使南宮懷珍至奉宣聖旨存問兼賜臣墨詔天光下濟叡澤曲流銜恩未酬居寵彌懼中謝臣受任斯極微功莫施昨以封略未寧干戈猶動壽春固壘以備盜淮甸興師以扞姦經費所資數盈鉅萬餽餉時久供億力殫慮始圖終不敢緘默輒陳管見上黷宸聰伏蒙聖慈特遂誠請遠承如綍之旨特假聚人之財軍須不愆士氣彌振糗糧既備永無半菽之虞襦袴足頒遠超挾纊之感是爲說使咸願先登臣忝總戎倍百欣荷伏以上分國用俯濟軍興候清煙塵謹備償納

請赴行營表

臣某言臣自守淮濱已周星紀虔奉朝典粗安遐方素效未聞新恩薦及身曳

兩綬寄深一隅蚊蚋負山力誠不足鷹鷂逐鳥志則有餘臣再授兵符夙參軍幕披堅執銳雖未經於戎行制勝伐謀亦常習於事業自忝藩翰屬時清平無施汗馬之勞但詠彘弓之什今則幸遇殊獎委之專征以身率先是臣素志況聞徐州士衆本無叛心倉卒之閒危疑至此臣請自臨疆場親領紀綱裂帛繫書諭其禍福椎牛饗士養以威聲冀宣皇風煦茲蠢類以忠義感脅從之伍以含弘安反側之徒革面悛心期乎不日其揚州留務請令行軍司馬路應權知伏乞聖慈俯賜照鑒

謝兵馬使朱鄭等官表

初除侍御史續除中丞異姓王

臣某言奏事官韋溫特蒙聖恩重賜朱鄭等官告宸象昭回煥然下燭榮分右職光賁遐藩謝中臣伏以朱鄭朴忠爲心沈毅見色當建封禦侮之寄見張愔提孩之年昨者隸職徐州分鎮蘄縣繹騷之際梗亮彌彰歷險而來寔繁其旅詳探本末有足褒稱輒具奏聞恐須獎勸伏蒙睿覽俯亮微誠優詔先行已階直指之列殊私薦至超升獨坐之崇戶領三千爵踰五等恩生非次感異常倫轅

門有光武旅增氣遂使感激之士希勇爵以捐軀猖狂之徒聆聖澤而悛性風行草偃其勢必然臣忝總戎麾倍百欣荷

賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事天地弘覆燾之恩雷雨施渙汗之澤瑕累咸滌危疑獲安中謝臣伏以少誠擅與兵戈事生註誤自王師致討天威下臨曾無悖辭亟聞引咎初懷疑懼雖擁衆以偷生旋感聖神屢拜章而請命陛下仁深解網慮軫納隍念餽餉飛輓之勤閱戰爭暴露之苦舉茲宥過之典副彼效順之誠一方承再造之恩九有覩惟新之化敷鴻霈而覃及蠢類鼓仁風而臻於太和罷柝銷鋒自茲而始臣謬膺重寄虔守遐藩不獲稱慶璠墀陳露丹懇仰瞻宸極倍百常情無任慶抃屏營之至

賀除虔王等表

臣某言中使李國真至奉宣聖旨存問兼賜臣墨詔鴻澤浹下大明燭幽曉諭

便蕃慰安稠疊

中謝

臣伏觀天書恭承睿旨弘愛人屈己之道酌因時適變之宜

擇賢王作鎮徐方俾張愔便主留務上則成邦家盤石之固下則副士衆拜章之請咸藩之寄斯重舊勳之祀獲全丕變猖狂之徒咸躋仁壽之域既弘在宥坐見止戈率土人臣孰不欣說臣素乏方略謬荷寵光猥塵將相之名無施分寸之績遭逢若此報效蔑聞官謗已興渥刑宜及陛下恩深覆載道務含弘恤公私餽餉之勤念吏士鋒鏑之苦特紉神算昭發德音危疑獲安制置惟固好生宥過誠陛下開網之仁尸位無功重微臣素餐之責周章踟躕胡顏自安但以遐守藩條恪居官次不獲仰謝雲陛陳露血誠未遂周任知止之言敢逃臧文竊位之咎無任戰越之至

慰義陽公主薨表

臣某言伏承義陽公主薨伏惟聖懷傷悼增切伏以公主妍姿令則冠絕天人稟教皇宮已挺柔嘉之德降嬪卿族益彰貞粹之儀方其作範壺闈長榮邸第豈意邁茲短曆奄謝昌辰伏慮陛下軫念未捐深慈莫遣有虧常膳罷設宮懸

臣子之情不任惕戀況聖凡禮異邦家制殊伏願道齊彭殤理達脩短割肌膚之愛慰寰海之心率土人臣孰不相慰無任懇悃屏營之至

慰王太尉薨表

臣某言伏承成德軍節度使太尉兼中書令王武俊今月某日薨沒伏以武俊生逢昌時天授忠節奮揚義勇茂建勳庸秩冠朝端參燮和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊祔以興懷聽鼓鼙而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十一

劉賓客文集卷第十二

表章二 為淮南杜相公佑修凡十一首

謝冬衣表

謝濠泗兩州割屬淮南表

謝曆日面脂口脂表

謝墨詔表

論廢楚州營田表

請朝覲表

謝春衣表

謝賜門戟表

謝男師損等官表

謝端午日賜物表

謝墨詔表

謝冬衣表

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣兩副大將衣四副者大明昭回遠燭下土殊錫稠疊延及偏裨慶抃失圖捧戴相賀云云臣謬承委寄獲守藩條灰瑱屢移塵露無補陛下至仁天覆玄化風薰頒以兼衣賁茲瑣質降自天府光於轅門緘滕既開覩綵章之盛飾蹈舞而服發温煥於祁寒愧塵補袞之名更荷解衣之賜恩波下浹將校同沾共戴殊榮咸思竭節生成是荷雨露難酬無任懇悃慚荷之至

謝濠泗兩州割屬淮南表

臣某言伏奉十一月二十九日詔書其濠泗兩州令臣依前收管臣謬承寵光作鎮淮海位均九伯權總十連內省無堪常恐不逮豈謂恩私曲被封略有加慚無報政之勤重受分憂之寄伏以兵戈方息閭里未安謹當奉宣皇風慰彼黔首且責成於牧宰期不失於澄清伏惟聖明俯賜照鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官吏僧道耆壽百姓等兼賜臣墨詔及貞元十七年新曆一軸臘日面脂口脂紅雪紫雪并金花銀合二合稜合二皇明遠燭殊錫薦臻抃舞失容捧戴無措伏惟皇帝陛下立極御人順時布政禮崇大蜡澤浹遐藩臣叨榮日深竊位時久謬回宸眷猥降王人天書下臨覩三光之照耀玉曆爰授知四時之環周雕匳旣開珍藥斯見膏凝雪瑩含液騰芳頓光蒲柳之容永去癘疵之患命輕恩重上答何階無任感抃屏營之至

謝墨詔表

臣某言中使陳日華至奉宣聖旨存問兼賜臣墨詔又以臣所奏羅珣及裴靖政理有方今各賜手詔激賞者恩降重霄澤流下土義存獎勸榮冠等夷臣昨以羅珣裴靖勵精吏理效用著明人咸說安俗致殷阜急須甄錄以勸在官輒獻封章具陳成績伏蒙睿鑒俯亮愚衷載嘉理行之尤光示絲綸之旨守道者益以固志懷慝者由是悛心激俗化人於慈爲大臣謬司廉問職在澄清幸遇

旌善之時獲免蔽賢之責無任欣感之至

論廢楚州營田表

臣某言中使曹進玉至奉宣聖旨存問兼賜臣墨詔以楚州營田廢置事令臣商量奏來者跪奉天書恭承睿旨道存致用義在隨時云云伏以本置營田是求足食今則徒有糜費鮮逢順成刈穫所收無裨於國用種糧每闕常假於供司較其利害宜廢已久比來循守舊制不敢輕有上陳皇明鑒微特革斯弊取其田蓄授彼黎蒸仍俾簿租誠爲至當但以田數雖廣地力各殊須量沃瘠用立程度臣已追里正臣與商量利便謹具別狀奏聞伏惟聖慮俯賜詳擇無任震越屏營之至

請朝覲表

臣某言臣聞臣之事君有犯無隱懇誠所至敢不罄陳伏惟聖明俯賜矜察云云臣代受國恩忝承門蔭脫巾筮仕敢期榮名陳力效官靡樹聲績始因孤直驟歷清班復加朝覲作藩外府遠違輦下十有四年恪守淮濱逮今一紀犬馬

懷戀寢興匪遑蒲柳易衰遲莫俄及竊位時久妨賢愧深沉歷官已來四十八
考祇奉朝謁時纔二周服勤郡符荏苒垂老屏營魏闕之思夢想承明之游如
迫餒寒不忘衣食伏惟睿鑒俯亮愚衷蚤賜擇人與臣交代授受之際冀無可
虞然後脂車奔赴京輦微願斯畢雖死猶生臣頃以戎務方殷猥加宰輔今既
事罷實慚此名爲有藩鎮同時未敢輕上印綬伏以聖朝赫赫左右惟賢漢愧
得人周慚多士臣才略旣短齒髮又衰柄用之地甘心自絕所冀退歸舊里沐
浴皇風絕鍾鳴漏盡之譏展維桑與梓之敬匪惟名器不假實貴骸骨可全知
止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官吏僧道耆壽百姓等并賜
臣墨詔及春衣兩副大將衣四副王人捧詔御府降衣寵光不隔於遐藩慶賜
猥霑於裨將臣素乏器能謬膺驅使每慚效薄常懼食浮陛下覃以至仁均其
厚施宰元和而布澤順時律以頒衣出自禁中賁於臣下執領檜而抃舞失次

被纖柔而顧盼增輝舉體動容既安且吉在身不稱恐招鷄翼之譏居位無功叨受鶴紋之賜下延將校同荷生成

謝賜門戟表

臣某言臣得進奏官裴邁狀報本月九日軍器使梁延專奉宣進止付所司准省牒賜臣門戟十二竿者恩降雲天榮加門戶承旨慶抃省躬慚惶伏以禮著等威朝有命數是昭懋賞必在疇庸臣謬荷寵光素無績效旌旄之寄已忝外藩榮戟爰列更光私第竇於棖闈慶及子孫覩茲盛儀實愧虛受無任欣戴屏營之至

謝男師損等官表

伏見今月一日制授臣長男師損祕書省著作郎次男式方太常寺主簿又得進奏官裴邁狀報伏承聖恩特降中使送官告到臣宅分付師損者寵渥非常授任不次驚躍無措覲懼失容云云臣謬分重寄獲守外藩受恩既深無績可紀男師損等器惟凡品教闕義方蚤沐歡慈已階官次每懷塵忝常誠滿盈豈

謂鴻霈曲覃大明私照寬臣尸素之責念臣葵藿之誠下延胤息叨踐班級天書出禁中貴臨門榮冠等夷慶流宗族況著作乃論撰之地唯才吏是居太常實禮樂之司非儒者勿履顧茲庸昧忽此超昇內省慚惶若墜冰谷伏以聖朝立制建官惟賢名實無乖輪轅盡適微臣父子獨爲幸人非據踰涯自中徂外虛受丘山之賜實增負乘之憂進退彷徨不知所據無任戰汗屏營之至

謝端午日賜物表

臣某言中使劉光弼至奉宣聖旨慰勞臣及將佐官吏僧道耆壽百姓等兼賜臣墨詔并衣一副金花銀器三事綵絲一軸大將衣四副綵絲五軸寵光薦至慶賜曲霈林舞失容捧戴無力伏以朱明仲月端午佳辰萬國被薰風之和九天垂湛露之澤臣幸逢休運獲守外藩叨承睿慈猥受榮賚發詔而煥窺宸象振衣而頓失炎威色絲表祥戴光於佩服珍器充玩盡飾於圓方恩輝旣盈喜懼交集下延裨將共荷鴻私無任感戴之至

謝墨詔表

臣某言中使陳日華至奉宣聖旨慰勞臣及將佐官吏僧道耆壽百姓等兼賜
臣墨詔恩降紫泥澤流下土跪奉自天之命遙馳捧日之心云云伏以皇帝陛
下凝旒穆清軫念黎獻已洽雍熙之化尙存宵旰之勤遠降王人特迂宸翰慰
安稠疊曉諭便蕃任重力微不知上答應緣戎旅庶務謹具別狀奏聞伏乞皇
明俯賜照鑒無任感戴屏營之至

劉賓客文集卷第十二

劉賓客文集卷第十三

表章二

爲杜司徒讓度支鹽鐵等使表

爲杜司徒謝追贈表

爲杜司徒讓淮南立去思碑表

爲京兆李尹賀遷獻懿二祖表

爲京兆韋尹賀兩止表

爲京兆韋尹賀祈晴獲應表

爲京兆韋尹謝許折糴表

爲京兆韋尹賀元日祥雪表

爲京兆韋尹賀春雪表

爲京兆李尹賀兩表

爲李中丞謝紫雪面脂等表

爲李中丞謝鍾馗曆日表

爲杜相公謝鍾馗曆日表

爲武中丞謝新茶表

爲武中丞謝春衣表

爲武中丞再謝新茶表

爲武中丞謝新橘表

爲武中丞謝柑子表

爲武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章事充度支及諸道鹽鐵轉運等使者臣久塵高位尸素已多更受新恩滿盈爲懼云云伏惟皇帝陛下紹登寶位光纂鴻猷擢用之閒華夷聳聽況利權所在宜適變通國計是資須明輕重當至化鼎新之日是微臣遲莫之年將何以上副宸衷下成庶務進退惟

谷冰炭在懷輒罄愚誠冀回天監陳力無補庶遵周任之言循涯若驚敢飾范
宣之讓慚惶踟躕倍萬常情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕射者時逢霈澤禮極徽章
云云臣家受國恩至臣累葉常懼不克負荷以忝前人豈意多幸遭逢猥居高
位陛下應乾御極作解庇人恩浹寰區禮成宗廟垂仁布德自葉流根紫書忽
降於重霄密印榮加於厚夜星霜增感蒸嘗有輝非臣殞越所能上報無任感
咽屏營之至

杜司徒讓淮南立去思碑表

臣某言伏見淮南節度使王鏐所奏當道將吏僧道耆壽等請爲臣立去思碑
伏奉聖旨允其所奏臣內惟菲薄聲績無聞祇荷恩私慚懼交至云云臣伏蒙
先朝過獎累典方隅頃鎮江都十有四載數周星紀水旱備經境接淮瀆兵戈
時起至於邑里粗免流離非臣所能悉稟聖化在唐堯可封之日奚假吏師當

漢室責實之時皆承詔旨王鏐與臣交代輒有上聞況以去思爲名慚無可紀之績伏以建碑有制甲令垂文苟非至公翻益貽誚臣伏覽故事宋璟自廣州都督入爲尚書南海之人請爲刊石璟自遜讓至於再三雖勒其文竟從降制著在國史垂爲美談璟非苟榮人益見德臣才誠不逮心實慕之伏乞聖慈賜寢前命臣情非飾讓義在徇公云云

京兆李尹賀遷獻懿二祖表

實

臣某言伏見詔書以今月某日奉遷獻祖懿祖神主祔於德明興聖皇帝廟感禮云畢宗祧永安云云伏以太祖景皇帝膺期撫運啓封於唐爲百代不遷之宗開三靈眷命之兆頃以本朝初建清廟備儀二祖冠西室之先景皇闕東向之位諸儒獻議歷載未行陛下濬發叡謨旁延正論爰詔多士會於中臺酌三禮之前文參百王之故事講貫斯定詢謀僉同撰日展儀考祥視履配貴神於遠祖正尊位於始封廟貌有嚴禘嘗允穆示人以孝得禮之中旣觀秩秩之容必降穰穰之福臣職居內史屬忝本枝躬導盛儀獲申誠敬無任感說屏營之

至

京兆韋尹賀雨止表

夏卿

臣某言今月某日中使吳文政奉宣聖旨緣今年雨多恐傷苗稼諸有靈跡處並宜祈禱者臣謹檢尋祀典方議徧祠惟德動天倏已澄霽伏以至教惠農北人務本今歲宿麥茂於常年爰自季春遂逢多雨蓋陰陽常數有以推遷而隴畝之閒未聞傷敗陛下勞謙思切覆育恩深或慮成災先期軫念昭薦未陳於方社叡誠已格於上玄文明煥開陰暄潛埽有年之慶實兆於茲辰先天不違夔超於前代臣謬司京邑虔撫蒸黎欣抃之誠倍百羣品無任踴躍屏營之至

京兆韋尹賀祈晴獲應表

臣某言今月十七日中使某奉宣聖旨以霖雨未晴諸有靈跡並令祈禱者臣當時於興聖寺竹林神親自祈祝兼差官城外分路徧祠伏以神祇效靈景物澄霽兆庶覩動天之德大田俟多稼之期臣謬荷恩輝忝司京邑抃說之至實倍常情

京兆韋尹謝許折糴表

臣某言伏奉詔旨以臣所請畿內折糴宜令度支計會定數奏來者天慈廣被人瘼是求臣自理京邑不先威刑唯務便安所期富庶每因賜對常奉德音府縣之闕巨細令奏伏以聖明在上風雨應時順成之年穀糴常賤若無輕重之法必利兼并之家輒敢上聞請行折糴天光下燭人隱無遺宣付所司允臣所奏事關理本惠及生靈臣忝尹京倍百欣荷無任歡躍屏營之至

京兆韋尹賀元日祥雪表

臣某言伏以去冬已來久無雨雪臣每於內殿親奉德音以宿麥未滋爲虞以兆人生疾爲念聖情所屬神理階通獻歲發春佳雪肇降當夷夏會同之日觀天人合應之徵迎喜氣於三元浹歡心於萬國癘疵永息豐阜可期臣以疾疹未平步趨有阻伏蒙恩貸已具奏聞謹於光宅寺中管當本務不獲隨例稱慶明庭旣覩嘉祥益彰聖德無任欣躍屏營之至

京兆韋尹賀春雪表

臣某言伏奉詔旨充某郡主禮命賜使謝恩之日親承德音以春初已來雨雪猶少慮妨農事有軫睿慈今當下嫁之辰克致上玄之感雲生河漢及佳期而降祥雪滿寰區應豐年而呈瑞臣官當撫字職在肅雍慶抃之誠實倍常品

京兆李尹賀雨表

臣某言伏奉進旨以時雨愆候有妨耕農應諸有靈跡處並令祈請者德音才發膏雨驟飛滂霂已周動植咸說云云伏以久愆時澤上軫聖慈爰命禱祈俾申誠敬神應如響天且不違未興雲漢之詩已致桑林之雨臣謬司京邑虔撫黎蒸覩豐年之可期同比屋而稱慶無任欣抃之至

李中丞謝賜紫雪面脂等表

啟

臣某言中使某乙至奉宣聖旨賜臣紫雪紅雪面脂口脂各一合澡豆一袋特降王人俯臨私第銜恩慶抃省己慚惶云云臣謬荷寵私素無績效空變星霜之候猥霑慶賜之恩跪捧雕匳榮觀珍藥功能去疾永絕於癘疵澤可飾容頓光於蒲柳生成是荷雨露難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日一軸恩降雲霄光生里巷雖當歲莫如煦陽和云云伏以將慶新年聿循故事績其神象表去癘之方頒以曆書敬授時之始微臣何幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀方回雖逢歲盡恩輝忽降已覺春來云云伏以圖寫威神驅除羣癘頒行肆曆敬授四時施張有嚴既增門戶之貴動用協吉常爲掌握之珍瞻仰披尋皆知聖澤無任欣戴之至貞元二十一年十二月日

武中丞謝新茶表

元衡

臣某言中使竇國安奉宣聖旨賜新茶一斤猥降王人光臨私室恭承慶賜跪啓緘封云云伏以方隅入貢采擷至珍自遠爰來以新爲貴捧而觀妙飲以滌煩顧蘭露而慚芳豈蔗漿而齊味既榮凡口感倍丹心無任歡躍感恩之至貞

元二十年三月日

武中丞謝春衣表

臣某言中使某乙奉宣聖旨賜臣春衣一副王人臨第御府降衣扑舞失容捧戴無措云云伏以律當春莫慶洽時邕萬物被薰風之和九天垂湛露之澤受任非次速尤是虞方懷匪服之憂更荷解衣之賜恩加盡飾拖朱紫而爲榮受非以庸顧形影而增愧丹誠徒罄玄造難酬無任踴躍屏營之至

武中丞再謝新茶表

臣某言中使某乙奉宣聖旨賜臣新茶一斤猥沐深恩再霑殊錫承旨慶扑省躬慚惶伏以貢自外方珍殊衆品效參藥石芳越椒蘭出自仙廚俯頒私室義同推食空荷於曲成責在素餐實慚於虛受

武中丞謝新橘表

臣某言中使某乙至奉宣聖旨賜臣新橘若干顆特降寵光猥頒慶賜珍踰百果榮比兼金伏以丹實初成苞貢爰至芬馨味重方列於御筵雨露恩深忽霑

於賤品感同推食事等絕甘豈唯適口爲珍實冀捐軀上答

武中丞謝柑子表

臣某言中使某乙至奉宣聖旨賜臣柑子若干顆特降殊私再頒名果自遠稱貴以新爲榮伏以方貢外來人閒未覩黃苞輝穎彫俎增華芬芳初佐於大庖慶賜遂沾於凡口甘踰葦實剖食旣同於楚謠寒比蔗漿析醒何慚於漢史感恩思效倍百常情

武中丞謝冬衣表

臣某言中使某乙至奉宣聖旨賜臣冬衣一副恩降重霄榮加陋質承旨慶抃省躬慚惶臣受任已來微效莫著每更時律慚曠官常豈謂玄造曲成鴻私薦及念茲戒寒之候錫以禦冬之衣抃舞失容顧盼增飾鶴文是錫遠慚晉代之賢鷩翼不濡實懼曹風之刺無任感戴屏營之至

劉賓客文集卷第十四

表章四 牋附

爲容州竇中丞謝上表

謝中使送上表

賀收蔡州表

賀赦表

賀赦牋

賀雪鎮州表

賀平淄青表

夔州謝上表

賀冊皇太子表

慰國哀表

賀龍飛表

賀皇太子牋

賀赦表

賀冊太皇太后表

賀冊皇太后表

和州謝上表

賀改元赦表

夔州論利害表二首

為容州竇中丞謝上表

羣時在朗州相逢因以見託

臣某言伏奉某月日制書授臣容州刺史兼御史中丞充本管經略招討等使臣發開州日已差某官某乙奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術頃因多幸賁自丘園累沐聖慈驟居清貫識昧通變動乖事宜愧無善狀以塞公責伏惟叡聖文武皇帝陛下凝旒穆清洞照寰海推共理之義分寄股肱念蒸人之勤溥沾遐邇

察臣前任事實恕臣本性朴愚賜以恩輝拔於廢棄遠辭偏郡重委方隅捧印授以爲榮望闕庭而增戀雖到官之始惠未及人而率下之誠務先克己凡施正教皆稟詔條參以土宜遂其物性可行必守有弊必除使蠻夷生梗之風慕臣子盡忠之道力誠不足心實在茲伏乞聖明俯賜照鑒無任感戴屏營之至元和八年云云

謝中使送上表

臣某言中使吐突仕曉至奉宣聖旨慰諭并送臣至本任者深山遠郡忽降王人跪受恩榮仰瞻宸極伏以發自巴峽至于南荒涉水陸湍險之途當炎夏鬱蒸之候山川縈轉晨夜奔馳幸無他疾得至本管九重結戀遙傾捧日之心萬里獲安皆荷自天之祐無任感戴屏營之至

賀收蔡州表

臣某言伏見詔書以唐州節度使李勣生擒逆賊吳元濟獻俘文武百僚於興安門列班稱賀者天威遠被元惡就誅一方既平萬國咸慶伏惟睿聖文武皇

帝陛下德超邃古道合上玄臨御已來天人協贊削平吳蜀掃蕩塞垣車書大
同夷狄來貢叢爾元濟敢懷野心輒聚犬羊苟偷時月陛下聖謨獨運叡感潛
通天助神兵人生勇氣旣擒兇逆遂正刑書伏三紀之逋誅成九衢之壯觀宗
社昭告華夷式瞻行弔伐而在禮無違烜威聲而何城不克楚氛改色淮水安
流漢上疲人盡霑雨露汝南遺老重覩昇平凡在具臣孰不欣抃臣久辭朝列
恭守遐藩不獲稱慶闕庭陳露丹悃仰瞻宸極倍萬羣情無任踴躍慶快之至
元和十二年十二月二十三日

賀赦表

臣某言伏奉今月一日制書大赦天下者聖德廣運浹於華夷天光下臨照彼
幽蟄伏惟叡聖文武皇帝陛下神扶寶祚天贊鴻猷意有所之事無不克當淮
右凱旋之後是域中慶幸之時順陽和以發生施霑澤於寰海網開三面危疑
者許以自新耳達四聰瑕累者期於錄用求碩畫於庶位慮遺材於放臣旌忠
烈之家賞勳庸之胤仁及枯骨無隔於寇戎榮加顯親普沾於存沒恤刑已責

實廩蠲徭頒錫彰有客之詩崇儒協宗子之望岳瀆咸秩耆艾飲和大僚承任
子之恩武旅荷賜金之寵斯皆禹湯文武之遺美高祖太宗之耿光集於聖朝
然後大備德音所至和氣隨之歡謠上徹於九天福祚永延於億載能使遠夷
屈膝豈惟小醜革心率土人臣不勝大慶臣久辭闕下恪守海隅犬馬之誠倍
百常品無任抃躍屏營之至

賀救牋

使持節連州諸軍事守連州刺史劉某惶恐叩頭伏見今月一日制書大赦天
下者伏以獻歲布和皇恩遠降乾坤交泰寰海廓清伏惟皇太子殿下道冠元
良德兼忠孝承顏拜慶榮輝古今某職守有限不獲隨例稱賀宮庭無任欣說
之至元和十三年正月二十九日

賀雪鎮州表

臣某言伏見四月二十七日德音以王承宗效順著明復其官爵所獻二郡別
置藩垣聖德動天鴻恩及物瑕累咸滌蒸黎永安伏惟睿聖文武皇帝陛下自

承寶位克振皇綱既以四海爲家每念一夫不獲昨因大慶爰降殊私廣宥過之科開自新之路綸言一發神聖潛通遂令迷誤之徒頓釋憂危之慮命胤子以入侍獻名都以效誠臣心既明天網爲解因析四郡別爲一方惟懷永圖盡去前弊大河以北化爲禮樂之鄉率土之濱重見昇平之日臣恪居官次遐守嶺隅不獲稱慶闕庭無任踴躍屏營之至

賀平淄青表

臣某言伏見制旨魏博節度使所奏逆賊李師道并男二人並梟斬訖以二月十六日御宣政殿受賀者聖德玄運兵威神速旬月之內鯨鯢就誅泰嶽既寧登封有日伏惟睿聖文武皇帝陛下有征必克舉意無違天地協神算之期雷霆助成師之氣蠢爾孽豎敢生野心繡斧一臨妖氛自滅皆由聖慈廣被睿略潛通獻俘者盡許生還得地者復令安堵感我仁化激其深衷凡是脅從盡思效節五紀巢穴一朝蕩夷遂使齊魯之鄉復歸仁壽之域捷書既至傳首繼來備文物於明庭告殊勳於清廟百辟陳賀萬方會同此止從戈所以爲武西周

士庶方觀欽至之容東嶽煙雲已望告成之禮臣恪居遠服嘗忝班行慶快之誠倍萬羣品無任踴躍屏營之至元和十四年三月二十四日

夔州謝上表

臣某言伏奉某月日制書授臣使持節都督夔州諸軍事守夔州刺史跪受天詔神魂震驚伏惟文武孝德皇帝陛下垂衣穆清睿鑑旁達三統交泰百神降祥浹於華夷盡致仁壽臣家本儒素業在藝文貞元年中三忝科第德宗皇帝記其姓名知無黨援擢爲御史在臺三載例遷省官權臣奏用分判錢穀竟坐連累貶在遐藩先朝追還方念淹滯又遭讒嫉出牧遠州家禍所鍾沈伏草土禮經有制羸疾僅存甘於畎畝以樂皇化伏遇陛下大明御宇照燭無私念以殘生舉其彝典獲居善部伏感天慈臣卽以今月二日到任上訖硤水千里巴山萬重空懷向日之心未有朝天之路無任感恩戀闕之至長慶二年正月五日

日

賀冊皇太子表

臣某言伏見制書以十二月二十日冊皇太子盛禮斯畢德音遐宣萬國以貞庶類咸說伏惟文武孝德皇帝陛下體元立極垂訓御時旣闡王猷思安國本前星位定拱宸極以昭彰震氣宣與天地而長久禮先七鬯澤被華夷宗祏有無疆之休生靈懷莫大之慶臣恪居官次遐守巴南不獲稱賀闕庭無任踴躍屏營之至長慶三年正月日

慰國哀表

臣某言上天降禍大行皇帝奄棄萬國奉諱號擗糜潰五情伏惟皇帝陛下孝思至性攀號罔極臣忝守所部不獲陪位兩宮伏增感慕之至謹奉表陳慰以聞長慶四年二月日

賀龍飛表

臣某言伏見詔書正月二十六日皇帝陛下嗣登寶位萬國同歡日月繼明乾坤交泰伏惟皇帝陛下欽承顧命惟懷永圖以大孝奉宗祧以至仁蘇品物洞照寰海統和神人聖祚延長從今無極羣生鼓舞自此大寧臣守遐藩恪居官

次不獲奔馳拜舞稱賀闕庭無任抃躍屏營之至長慶四年二月日

賀皇太子牋

使持節都督夔州刺史劉某叩頭伏惟皇太子殿下祇膺詔冊光啓儲闈展至性於三朝承本枝於百代宗祏永固神人以和四嶽仰維嵩之高百川承少海之潤某限以職守不獲隨例稱慶宮庭無任抃躍之至

賀赦表

臣某言伏見今月三日制書大赦天下者大明初昇萬物咸覩渙汗一發神人以和伏惟皇帝陛下天資叡聖神啓昌期端拱受萬國之朝承顏奉兩宮之慶初嗣大位克揚孝心三光協明和氣來應臣伏讀赦令首於奉園陵盡誠敬親九族蘇兆人次及定章程止進獻已逋責滌夙瑕內照於九重則歸嬪嬙放鷹犬外明於四目則求隱士開直聲柔遠以仁則還其係虜賞延以禮則澤及後昆菲食遵夏禹之規弋絺法漢文之儉墜典咸舉舊章再明昇平之期正在今日發號之始疾於春風殊私所及霑若時雨臣幸逢昌運歷事五朝出守遐藩

僅垂二紀欣承雷雨作解之澤不勝犬馬戀主之誠瞻望帝鄉無任屏營懇悃
之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽章克備慶賜遠行榮冠古
今澤周寰海伏惟皇帝陛下纘承列聖歡奉兩宮太皇太后含飴保和重光疊
慶漢儀盛於長信周祚興於太任方之聖朝彼有慚德臣遠守巴峽不獲稱賀
闕庭無任抃躍屏營之至長慶四年三月日

賀冊皇太后表

臣某言伏見制書以二月二十五日冊立皇太后盛禮畢陳德音遠被一人有
慶萬國同歡伏惟皇太后稟靈作合誕聖表祥徽號極域中之尊慈仁爲天下
之母陛下君臨有國子道無違長樂宮中永獻南山之壽濯龍門上再揚東漢
之風率土臣子不勝歡抃臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州刺史臣自理巴賚不聞善
最恩私忽降慶抃失容伏惟皇帝陛下丕承寶祚光闡鴻猷有漢武天人之姿
稟周成叡哲之德發言合古舉意通神委用得人動植咸說理平之速從古無
倫微臣何幸獲覩昌運臣業在詞學蚤歲策名德宗尙文擢爲御史出入中外
歷事五朝累承恩光三換符竹在分憂之寄祿秩非輕而素蓄所長效用無日
臣聞一物失所前王軫懷今逢聖朝豈患無位臣卽以今月二十六日到所任
上訖伏以地在江淮俗參吳楚災旱之後綏撫誠難謹當奉宣皇恩慰彼黎庶
久於其道冀使知方伏乞聖慈俯賜照鑒臣遠守藩服不獲拜舞闕庭無任懇
悃屏營之至謹差當州軍事衙官章典奉表陳謝以聞長慶四年十月二十六
日

賀改元赦表

臣某言伏見今月七日制書大赦天下者帝遊出震聖澤如春神人以和天地
交泰伏惟皇帝陛下丕承鴻業光闡叡圖吉日展嚴配之儀告天陳太平之盛

九廟成禮百神降祥鑾輅旋衡風雲改色殊私廣被再弘莫大之恩寶曆惟新更啓無疆之祚兩宮承慶四海永寧率土臣子上千萬壽臣恪居官次不獲稱賀闕庭無任屏營之至謹差當州軍事衙官試慈州吉昌府別將徐倫奉表陳賀以聞寶曆元年二月十六日

夔州論利害表

臣某言伏準元和十二年四月十八日敕敕諸州刺史如有利害可言者不限持節任自上表聞奏者臣伏見貞觀中詔許羣臣各上書言利便馬周時一布衣遂因中郎將常何獻策二十餘事太宗深奇之盡行其言擢周爲御史至龍朔中壁州刺史鄧弘慶進平索看精四字堪爲酒令高宗嘉之亦行其言遷弘慶爲朗州刺史則知苟有所見雖布衣之賤遠守之微亦可施用況臣早受國恩德宗朝忝爲御史逮今歷事四朝頻領藩條當陛下至明之時是微臣竭節之日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜照鑒無任感激屏營之至謹差當州軍事衙官守易州安義

府別將員外置同正員雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下睿哲自天纘成列聖善述先志發揚德音率土人臣不勝慶幸臣虔奉詔旨宣示蒸黎伏以華夏不同土宜各異詳求利病謹具奏聞伏乞聖慈俯賜照鑒臣伏覽國史竊見開元十八年朝集使至京玄宗臨軒親問利害時宣州刺史裴耀卿上便宜事論轉輸甚詳竟不行下至二十一年耀卿爲京兆尹再以前事奏論方見允納比及三年漕運七百萬石省脚三十餘萬貫當耀卿前不見納必有人非之及後數年方展其效臣僻守遠郡敢望言行祇奉詔書或冀萬一伏惟明主擇之無任懇悃屏營之至長慶四年五月十四日

劉賓客文集卷第十四

珍做宋版印

四

...

...

...

...

...

...

...

...

...

...

...

劉賓客文集卷第十五

表章五 牋附

為裴相公賀冊魯王表

為裴相公讓官第一表

并批答

第二表

并批答

第三表

并批答

蘇州謝上表

蘇州謝振賜表

蘇州賀冊皇太子表

蘇州賀冊皇太子牋

為裴相公賀冊魯王表

臣某言伏見制書以今日冊魯王禮畢皇家有慶寶祚無疆既榮本枝克固

盤石伏惟皇帝陛下德行列聖道冠前王孝敬承兩宮之歡虔恭奉九廟之化

先崇大禮慶浹天人次念建封事兼家國伏以魯王夙承睿訓特稟天姿爰擇吉辰光膺寵冊既示之以君親之道又錫之以禮義之邦寰海聞風室家相慶臣自嬰疾疹已歷旬時不獲展禮明庭拜舞稱賀

爲裴相公讓官第一表

并批答

臣某言臣去冬得疾近日加劇西夕之景豈能久留及其未亂披露誠懇臣犬馬之齒六十有七壽雖不長亦不爲短位忝公台近十五年皆由際會非以才進常懼官謗以招國刑今被病得死保其始終爲幸甚厚豈復嗟咨所恨者遇聖明之君不得佐成太平之化自量氣力忽恐奄然則有微素無階上達伏惟聖慈照鑒憐而察之伏以三公非曠職之地宰相非臥理之官伏枕之初已有陳乞請罷真食兼辭貴階伏蒙優詔纔遂一事頻降中使慰勉再三專令御醫旦夕診視苟安名器不覺經時主恩則深公議不可伏思陛下臨御之始宰臣四人逮今零落忽以一半臣且危憊餘年幾何唯易直外鎮獨得無恙竊推此理權位難居伏乞賜臣停官許在家養疾就閒辭祿或冀有瘳害盈福謙固是

神理儻天眷綢厚念以伏事多年臣之所陳未蒙便遂則國朝勳舊以疾辭位者皆得致事官使其家居足以頤養既有成例著於舊章伏望天恩特賜哀允省表具知夫爵位崇高以酬勳德君臣協契諒在始終斯乃前王之命圖有國之彝典也況卿輔相憲祖逮於朕躬履歷四朝夷險一致服事君之大節推濟物之深誠道光朝倫行滿天下倚注之意豈同他人屬朕纂曆御乾興師伐叛騷動累歲端憂靡遑及河朔載寧郊丘畢事方欲咨詢元老康靖生靈不虞寒暑所侵勤勞遇疾雖國醫診視中使省臨憂屬之誠頃刻在念忽覽章奏退讓官榮雖知止之心則思避寵而謀猷之體斯乃爲時寢食之間勉加頤養其所陳乞非朕意焉

第二表 并批答

臣某言臣所獻章表發於至誠伏奉批答未蒙允許外負公責內迫私情祈於必遂敢守難奪臣束髮已來號爲強力及其晚節亦未甚衰一朝被病遂至絲綵臣自思省得其端倪非飲食不節無有霧露之犯蓋由才微而任重功薄而

賞厚竊位既久妨賢則多以積年之過幸致今日之沈疾不能酌損所以生災
悟雖已晚情實非矯伏惟陛下念其委使之久察其危苦之詞特降深恩救臣
不逮無冒榮之咎得遂性之宜物議不形病心自泰忍死俟命披肝再陳伏乞
聖慈俯賜容納無任迫切懇禱之至

省表具知卿勳績崇高誠節忠蓋秉心一德宣力四朝訐謫緝熙弼予於理
勤勞事國啓沃匪躬功格道先常所嘉尚所疾未瘳勉於善養勿藥之喜佇
卽痊平台袞之司倚卿爲重乃累陳退讓殊謂不然宜體朕懷卽斷來表

第三表

并批答

臣某言得疾踰年在假三月再有陳請未蒙允從慮其奄忽銜愧入地伏惟聖
慈哀而信之臣聞君之使臣在知其心而聽其言不以容尸祿爲惠也臣之事
君在無隱情而盡忠節不以受非據爲榮也然後上下交感終始可詠臣伏事
陛下五年於茲葵藿微誠已蒙識察桑榆暮景所冀哀憐豈令危憊之時更懼
滿盈之禍雖有藥石安能調和聖日難逢生涯漸短體羸無拜舞之望心在有

涕戀之悲臣伏覽國史備見前事太宗朝李靖高宗朝劉仁軌皆自宰臣乞骸
致政其後知猶可用復起於家進退之閒曲盡情禮君臣之際良史美談伏望
陛下悉臣至誠念臣羸病許遂頤養以保餘年俟其有瘳或報萬一無任懇款
遑迫之至

省表具悉謝病之制雖起於昔賢盡瘁之詞亦標於古典況卿有功於國作
相累朝自匡輔眇身又勤勞數載豈可以微疾去位以重望辭榮章疏徒來
延遲彌切至如太宗朝許李靖致政高宗朝遂仁軌乞骸朕非不知事則有
異何者時當明聖在上理道已成宰臣優游因得自便今則生物尙困庶工
未修言念勳賢方深倚注惟此故事恐難遽行卿宜體朕誠懷力更頤養必
有多福以扶大忠無至確然復陳章表

蘇州謝上表

臣某言伏奉制書授臣使持節蘇州諸軍事守蘇州刺史始從郎署出領郡章
承命若驚省躬增感伏惟皇帝陛下受上玄之眷佑揚列聖之耿光大康黎元

慎擇牧守德音海發品物咸蘇臣本書生素無黨援謬以薄伎三登文科德宗皇帝擢爲御史在臺三載例轉省官永貞之初權臣領務遂奏錄用蓋聞虛名唯守職業實無朋附竟坐飛語貶在遐藩憲宗皇帝後知事情卻授刺史凡歷外任二十餘年伏遇陛下應運重光初無廢滯收拾耆舊塵忝班行旣幸逢時常思展效在集賢院四換星霜供進新書二千餘卷儒臣之分甘老於典墳優詔忽臨又委之符竹分憂誠重戀闕滋深石室之書空留筆札金闈之籍已去姓名本末可明申雪無路豈意聖慈弘納不隔卑微面辭之日特許升殿天顏咫尺臣禮兢惶不敢盡言空懷誠懇謝恩而出生光於九陌之闕受訓而行布政於五湖之外臣卽以今月六日到任上訖伏以水災之後物力索空臣謹宣皇風慰彼黎庶臣聞有味之物蠹蟲必生有才之人讒言必至事理如此古今同途了然辨之唯在明聖伏惟陛下察臣此言則天下之人無不幸甚江海遠地孤危小臣雖雨露之恩幽遐必被而犬馬之戀親近爲榮太和六年二月六

蘇州謝振賜表

臣某言伏奉去年二月十五日敕蘇州宜賜米一十二萬石委刺史據戶均給者恩降九天澤流萬姓伏以臣當州去年災沴尤甚水潦雖退流庸尙多臣前月到任奉宣聖旨闔境老幼無不涕零詢訪里閭備知凋瘵方具事實使欲奏論聖慈憂人照燭幽遠特有振卹救其災荒蒼生荷再造之恩儉歲同有年之慶臣忝爲長吏倍萬常情無任感激抃躍之至大和六年三月二十四日

蘇州賀冊皇太子表

臣某言伏奉制書以今月十日冊皇太子德音遐布盛禮畢陳國本永安人心同慶伏惟皇帝陛下以繼天之聖有知子之明義兼君親禮重宗祏龍樓肇建展嘉禮於三朝鳳曆延長固本枝於萬乘臣守在遐郡不獲稱慶闕庭無任踴躍屏營之至大和七年八月十七日

蘇州賀冊皇太子牋

朝議大夫使持節蘇州諸軍事守蘇州刺史上柱國劉某叩頭叩頭伏惟皇太

子殿下允膺上嗣光啓東朝蒼震發前星之輝黃離表重輪之瑞位居守器禮重承祧萬國以貞九圍咸說某限以守郡不獲稱慶宮庭無任踴躍屏營之至

劉賓客文集卷第十五

[Faint bleed-through text from the reverse side of the page, including characters like 臣、等、謹、言、伏、乞、聖、鑒、

劉賓客文集卷第十六

表章六

蘇州謝恩賜加章服表

蘇州賀皇帝疾愈表

汝州謝上表

同州謝上表并批答

賀梟斬鄭注表

賀德音表

賀赦表

謝恩賜粟麥表

慰淄王薨表

謝恩放先貸斛斗表

謝分司東都表

蘇州謝恩賜加章服表

臣某言伏奉去年十一月二十七日詔書加臣賜紫金魚袋餘如故者恩降重霄榮沾陋質虛黷陟明之典恐與彼己之詩寵過若驚喜深生懼謝臣起自書

生業文入仕德宗朝爲御史以孤直在臺順宗朝爲郎官以緣累出省憲宗皇帝後知其冤特降敕書追赴京國緣有虛忠稱居清班務進者爭先上封者潛毀巧言易信孤憤難申俄復一麾外轉三郡伏遇陛下膺期御宇大振滯淹哀臣宿舊猥見收拾職兼書殿官忝儀曹微勞未宣薄命多故又離省署重領郡符延英面辭親承教誨銜命卽路星言載馳到任之初便逢災疫奉宣聖澤恭守詔條上稟叡謀下求人瘼才術雖短憂勞則深幸免流離漸臻完復皆承聖化所及遂使人心獲安豈由微臣薄劣能致臣素乏親黨家本孤貧年衰無酒食之娛性拙無博弈之藝自領大郡又逢時災晝夜苦心寢食忘味曾經誣毀每事防虞唯託神明更無媒援豈期片善上達宸聰回日月之重光燭江湖之下國絲綸褒異苦節旣彰印綬煒煌老容如少望雲天而拜舞豈盡丹誠視環

玦以裴徊空嗟白首無任感激屏營之至太和七年十二月十六日

蘇州賀皇帝疾愈表

臣某言臣得本道觀察使報伏承聖躬痊愈已於紫宸殿視朝者一人有慶萬國同歡伏惟皇帝陛下外親萬務內奉三宮常懷宵旰之勤遂失寢興之適上玄降祐列聖表靈百神奔走以來扶四海精誠而致感勿藥有喜如山永安宗廟保無疆之休寔瀛申莫大之慶臣恪居官次遐守江干不獲稱賀闕庭無任踴躍屏營之至

汝州謝上表

臣某言伏奉去年七月十四日詔書授臣使持節汝州諸軍事守汝州刺史兼御史中丞充本道防禦使餘如故者臣久居遠服戀闕常深忽降新恩近鄉爲貴承旨慶抃省躬慚惶臣某誠歡誠喜頓首頓首伏惟皇帝陛下垂衣穆清之中旁照寰瀛之內車書所及動植咸安昨離班行遠守江徼延英辭日親奉德音知臣所部災荒許臣到任條奏共承睿旨宣示羣黎減其征徭頒以振賜伏

蒙聖澤救此天災疲羸再蘇幼艾同感二年連遭水潦百姓幸免流離交割之時戶口增長雖才術不足於事未周而憂勞則深爲衆所悉臣本業儒素頗登文科時命遭回再領軍郡卽以今月二十七日到任上訖謹當奉宣皇化慰彼蒼生臨汝水之波朝宗尙阻望秦城之日回照何時無任感激屏營之至謹差防禦押衙韋禮簡奉表陳謝

同州謝上表

并批答

臣某言伏奉去年十月二十三日制書授臣使持節同州諸軍事守同州刺史兼御史中丞充本州防禦長春宮等使恩降九重榮忝三輔承旨慶抃省躬慚惶臣某伏惟皇帝陛下丕承列聖光闡鴻猷氛祲埽除乾坤交泰臣幸逢昌運累沐殊私空荷生成之恩寧酬雨露之澤卽以今月二日到本州上訖謹宣叡旨安慰蒸黎伏以本州四年已來連遭旱損閭閻凋瘵遠近共知臣頃任蘇州之年亦遭大水之後面辭之日親奉德音至於撫綏皆承聖教二年之後百姓獲安今本部災荒物力困涸忝爲長吏敢不竭誠卽須條疏續具聞奏臣恪居

官次幸接王畿不獲拜舞彤庭陳露丹悃犬馬懷戀寢興匪寧瞻魏闕之容朝天尚阻望長安之路近日爲榮無任感激屏營之至謹差防禦知衙官試殿中監楊克乂奉表陳謝大和九年十二月二十一日

批答省表具知卿任居三輔職奉六條累聞問俗之勞載覽勤人之志言惟顧行深慰朕懷勉弘故經以副憂寄所謝知

賀梟斬鄭注表

臣某言伏奉前月二十五日詔書示逆賊鄭注已梟首訖氛妖殄滅華夏乂安伏以逆賊鄭注本出細微潛懷梟獍之心兼結兇狂之黨人倫共棄神理不容陛下睿略感通天人合應重臣協力禁旅齊心指顧之間猖狂自潰乾坤交泰日月增明凡在人臣不勝慶快臣恪居官次不獲稱賀闕庭無任欣歡抃躍之至大和九年十二月二日

賀德音表

臣某言伏見今月十六日德音布告遐邇天道下濟人情大安伏惟皇帝陛下

凝旒思理垂意擇材以日月無私之光照寰區有截之內貴使下情盡達寧虞厚貌潛謀一昨李訓鄭注等敢有逆心兼連兇黨陛下睿謀神斷左右協同頃刻之閒掃除已定重臣畢力禁旅竭忠氛祲廓清華夷咸說言念正刑之外或有註誤之徒再發德音廣宣聖澤當星紀回天之日迎陽和照物之光懷危疑者如山之安欲告訐者望風知懼非同謀者一切不問未結正者三宥從寬含生之倫普天同感臣恪居官次不獲稱慶闕庭云云謹差防禦知衙官朝議郎權知容州都督府司馬孫惕奉表

賀赦表

臣某言伏奉今月一日制書改大和十年為開成元年大赦天下者雷雨作解人神說隨澤及八荒網開三面臣某誠歡誠喜頓首頓首伏惟皇帝陛下上承乾綱下立人極用含弘光大之澤副夷夏會同之心獻歲改元惟新景祚先明首罪次及羣妖述睿情以曉萬方施鴻霈以蘇庶物恤辜宥過已責弛征郡縣之舊弊悉除賦稅之新規咸備停藩方節獻之禮以惠疲人回權管餘羨之財

以資京邑命使展澄清之志察言求讜直之材弓旌賁於丘園粟帛頒於耆艾
爰以初吉御宇明庭德音一發於九天和氣驟周於四海開物成務實表於建
元應天順人永延於億載至幸居近輔先受殊恩不獲稱慶闕庭陪榮班次衆
星列位常拱北辰之光新歲拜章遙獻南山之壽無任抃躍屏營之至

謝恩賜粟麥表

臣某言伏奉今月一日制書以臣當州連年歉旱特放開成元年夏青苗錢并
賜斛斗六萬石仰長吏逐急濟用不得非時量有抽斂於百姓者恩降九天澤
周萬姓優詔纔下羣情頓安臣某誠歡誠喜頓首頓首伏以災沴流行陰陽常
數物力既竭人心匪遑輒敢奏聞本求貸借皇恩廣被玄造曲成既免在田之
征仍頒發廩之賜臣謹宣赦文節目彰示兆人鼓舞歡謠自中徂外臣初到所
部便遇儉時今蒙聖慈將有振恤主恩及物已爲壽域之人衆意感天必有豐
年之應臣恪居官業不獲拜舞闕庭無任感激之至

慰淄王薨表

臣某言臣得進奏官楊惕狀報淄王薨輟朝三日伏惟皇帝陛下德邁前王情深近屬憫枝葉之謝諒切神衷割肌膚之愛何堪聖念萬方知化九族歸仁凡受國恩伏深悽惻臣恨以藩守不獲奉慰闕庭無任屏營之至

謝恩放先貸斛斗表

臣某言臣奉五月二十九日敕牒據度支所奏諸道節度觀察使及州府借便省司錢物斛斗等數內當州欠三萬六千二十三貫石並放免者殊私忽降逋責滌除藩方永安遐邇咸說臣某誠歡誠喜頓首頓首伏以關輔之閒頻年歉旱田租既須矜放公用又不支持承前長吏例有借便以救一時之急皆成積欠之名既未支填常懷憂懼聖恩周洽洞見物情爰命有司使之條奏去其舊弊衆已獲安嚴立新規人皆知措臣恪居官次不獲拜舞闕庭無任抃躍屏營之至

謝分司東都表

臣某言伏奉今月十九日制書授臣太子賓客分司東都者寵命自天戰越無

地臣發迹書生以文爲業出身入仕四十餘年頃自集賢學士出守吳郡面辭之日親承德音念百姓水潦之餘示微臣政理之法臣祇膺聖旨夙夜竭誠閭里獲安流庸盡復猥蒙朝獎錫以金章及遷同州又遇歉旱悉心綏撫幸免流離今荷天慈憫臣耆舊列名賓護之職分司河洛之都老馬沾束帛之恩枯株蒙雨露之澤獲居榮秩以畢餘年顧此微軀實爲厚幸伏以臣始爲御史逮事德宗今忝宮寮幸逢聖日舉四海之內賢能則多求六朝之臣零落將盡雖迫桑榆之景猶傾葵藿之心臣無任感恩惕抃之至

劉賓客文集卷第十六

此書之文... 卷之六... 卷之七... 卷之八... 卷之九... 卷之十... 卷之十一... 卷之十二... 卷之十三... 卷之十四... 卷之十五... 卷之十六... 卷之十七... 卷之十八... 卷之十九... 卷之二十... 卷之二十一... 卷之二十二... 卷之二十三... 卷之二十四... 卷之二十五... 卷之二十六... 卷之二十七... 卷之二十八... 卷之二十九... 卷之三十... 卷之三十一... 卷之三十二... 卷之三十三... 卷之三十四... 卷之三十五... 卷之三十六... 卷之三十七... 卷之三十八... 卷之三十九... 卷之四十... 卷之四十一... 卷之四十二... 卷之四十三... 卷之四十四... 卷之四十五... 卷之四十六... 卷之四十七... 卷之四十八... 卷之四十九... 卷之五十... 卷之五十一... 卷之五十二... 卷之五十三... 卷之五十四... 卷之五十五... 卷之五十六... 卷之五十七... 卷之五十八... 卷之五十九... 卷之六十... 卷之六十一... 卷之六十二... 卷之六十三... 卷之六十四... 卷之六十五... 卷之六十六... 卷之六十七... 卷之六十八... 卷之六十九... 卷之七十... 卷之七十一... 卷之七十二... 卷之七十三... 卷之七十四... 卷之七十五... 卷之七十六... 卷之七十七... 卷之七十八... 卷之七十九... 卷之八十... 卷之八十一... 卷之八十二... 卷之八十三... 卷之八十四... 卷之八十五... 卷之八十六... 卷之八十七... 卷之八十八... 卷之八十九... 卷之九十... 卷之九十一... 卷之九十二... 卷之九十三... 卷之九十四... 卷之九十五... 卷之九十六... 卷之九十七... 卷之九十八... 卷之九十九... 卷之百...

劉賓客文集卷第十七

狀

爲淮南杜相公論新羅請廣利方狀

爲京兆韋尹降誕日進衣狀

爲京兆李尹降誕日進衣狀

爲京兆韋尹進野豬狀

爲杜相公自淮南追入長安至長樂驛謝賜酒食狀

爲杜相公謝就宅賜食狀

爲東都韋留守謝賜食狀

爲裴相公進東封圖狀

舉崔監察羣自代狀

舉開州柳使君公綽自代狀

舉姜補闕倫自代狀

蘇州舉楊子韋中丞自代狀

蘇州上後謝宰相狀

蘇州加章服謝宰相狀

汝州上後謝宰相狀

汝州舉裴大夫自代狀

汝州進鷹狀

同州舉蕭諫議自代狀

上宰相賀德音狀

上宰相賀改元赦書狀

薦處士嚴恣狀

薦處士王龜狀

爲淮南杜相公論新羅請廣利方狀

淮南節度觀察處置等使敕賜貞元廣利方五卷右臣得新羅賀正使朴如言

狀稱請前件方一部將歸本國者伏以纂集神效出自聖衷藥必易求疾無隱狀搜方伎之祕要拯生靈之天瘡坐比華胥咸躋仁壽遂令絕域遙聽風聲美茲豐功爰有誠請臣以其久稱藩附素混車書航海獻琛既已通於華禮釋痾蠲癘豈獨隔於外區正當四海爲家冀覩十全之效臣卽欲寫付未敢自專謹錄奏聞

爲京兆韋尹降誕日進衣狀

衣一副四事黃折造衫一領白吳綾汗衫一領白花羅半臂一領白花羅袴一腰右伏以正陽令月誕聖嘉辰運協千年慶流萬國凡在臣子合有獻陳敢傾就日之心願奉如山之壽輕瀆宸辰無任兢惶

爲京兆李尹降誕日進衣狀

衣一副四事右伏以水德方清真龍下降天長地久瞻北極以常尊獻壽稱觴配南山而永固臣地居宗屬職忝尹京慶賀之誠倍萬常品前件衣服謹詣銀臺門奉進輕瀆旒宸伏用兢惶貞元十九年四月十九日

爲京兆韋尹進野豬狀

右伏以收穫之餘田獵有獲異於芻豢著在方書旣堪充庖輒敢上獻前件野豬謹隨狀進謹奏

爲杜相公自淮南進入長安至長樂驛謝賜酒食狀

具官臣某右臣今日至長樂驛高品某奉宣聖旨賜臣酒食者伏以恩降王人榮分御膳未展儀於雙闕先受賜於八珍品越脈膳味兼醪醴頓驚凡口倍益歡心無任欣躍

爲杜相公謝就宅賜食狀

具官臣某右高品某奉宣聖旨賜臣食者出自大官飫於私第光榮曲被猥承推食之恩驚蹇未施益重素餐之責舉其七筯若負丘山無任戰荷踴躍之至爲東都韋留守謝賜食狀

具官臣某右臣今日發至長樂驛中使某奉宣聖旨賜臣食者伏以味兼海陸品溢圓方降自御廚光臨傳舍臣初辭魏闕倍懷犬馬之誠猥受珍羞更切稻

梁之感無任欣躍

爲裴相公進東封圖狀

進賢殿御書院開元東封圖一面右臣謹按開元十三年玄宗皇帝以天下太平登封東岳聲明文物振耀古今伏惟陛下丕承耿光再闡鴻業祖宗盛事紹復有期臣所以寫成此圖輒敢上獻至於續畫躬自指揮徵史氏之文纂禮容之要山川氣象悉擬真形羽衛威儀咸稽故實所冀睿情一覽遐想玄蹤臣叨榮過深抱疾已久望陛下告成之日心必前知嗟老臣將謝之年身恐不見疲羸之際感激倍深前件圖謹差某官某謹詣光順門上進謹奏

舉崔監察羣自代狀

御史臺宣歙池等州都團練判官監察御史裏行崔羣右臣蒙恩授監察御史伏準建中元年正月五日制常參官上後三日舉一人自代者伏以前件官在諸生中號爲國器縈維外府人咸惜之臣旣深知敢舉自代貞元十九年閏十月日

舉開州柳使君公綽自代狀

尚書屯田某官等守開州刺史柳公綽右臣蒙恩授尚書屯田員外郎伏準建中元年正月五日制常參官上後三日舉一人自代者伏以前件官以賢良方正再敷王庭在流輩閱號爲端士昨除遠郡人皆惜之臣初蒙授官得以論薦多士之內非無其人竊惟用材宜自遠始謹具如前謹錄奏聞伏聽敕旨貞元二十一年四月八日

舉姜補闕倫自代狀

東都尚書省前左補闕姜倫右臣蒙恩授尚書主客郎中分司東都伏準建中元年正月五日敕常參官上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏以前件官有儒學士行蒙以諫官徵會其年老被疾不堪上道有司按視如狀不復逼迫至今家居而篤志無倦臣謹舉爲郎吏分司別都冀優賢振滯兩得其道大和元年六月十四

日

蘇州舉韋中丞自代狀

蘇州狀上中書門下諸道鹽鐵轉運江淮留後朝議郎守太僕少卿兼御史中丞上柱國賜紫金魚袋韋應物右臣蒙恩授蘇州刺史伏準建中元年正月五日制刺史上後舉一人自代者前件官歷掌劇務皆有美名執心不回臨事能斷今預職雖重本官尙輕伏以當州口賦首出諸郡況經災沴切在撫綏尙省無能輒敢公舉司權筦之利誠藉時才流豈弟之風實惟邦本非承臆說以塞詔書今具聞奏大和六年十二月九日

蘇州上後謝宰相狀

朝議大夫使持節蘇州諸軍事守蘇州刺史上柱國劉禹錫右某今月六日到州上訖某山東一書生潦倒疏闊在少壯日猶不逮人況今衰遲智力愈短相公哀憐不遇擢授名邦實荷弘獎慚非器使伏以當州絲大稷之後物力蕭然肌寒殞仆相枕於野誓當悉心條理續具奏論才術素空憂勞方始懼無聞問忝負恩知不任瞻望懇迫之至

蘇州加章服謝宰相狀

右某素乏吏才謬居劇郡以無庸之器當難治之時恭守詔條勤求人瘼伏以聖德柔遠皇明燭幽凡有上陳皆可其奏遂令管見得及疲黎自承雨露之恩非有循良之政猥蒙朝獎特降命書顧逢掖之腐儒被華章之貴服有黷陟明之典誠招彼己之譏限以守官不獲相謝瞻望榮感心魂載馳大和七年十二月日

汝州上後謝宰相狀

朝議大夫使持節汝州諸軍事守汝州刺史兼御史中丞充本州防禦使上柱國賜紫金魚袋劉某右某自領吳郡仍歲天災上稟詔條下求人瘼地苞藪澤俗尙剽輕悉心撫綏用法擒擿事繁才短常積憂虞忽蒙天恩稍移近郡家本榮上籍占洛陽病辭江干老見鄉樹榮感之至實倍常情印綬所拘不獲拜謝瞻望德宇精誠坐馳無任感戀之至

汝州舉裴大夫自代狀

正議大夫使持節杭州諸軍事守杭州刺史上柱國賜紫金魚袋裴弘泰右臣
蒙恩授汝州刺史兼御史中丞充本州防禦使伏準建中元年正月五日敕諸
州刺史上後舉一人自代者伏以前件官前爲九卿出領兩鎮頃因微累遂有
左遷今授遠州物情未塞臣前任鄰接具知公才舊屈未伸輒舉自代

云云

汝州進鷹狀

汝州防禦使當使進奉籠母鷹六聯右伏以前件鷹等學習應期馴養斯至列
於常貢有異衆禽受繼之時志已存於雲外下韞之際思展用於軍前旣懷百
中之能願獻三驅之禮謹差防御押衙景再休隨狀奉進以聞大和九年九月
十一日

同州舉蕭諫議自代狀

同州防禦使前諫議大夫蕭倣右臣蒙恩授同州刺史兼御史中丞充本州防
禦長春宮等使伏準貞元二年正月二十四日敕上後三日舉一人自代者伏
以前件官生於貴族伏膺儒門搢紳之閒號爲端士昨蒙朝擬冠於諫垣時方

被病不果上道長告已滿塊然家居今聞疾瘳可以錄用臣與倣久同班列知其材能爲官擇人敢舉自代大和九年十二月四日

上宰相賀德音狀

同州狀上中書門下今月十六日德音右被刑部牒宣示德音伏以聖澤滋深新恩廣被言念正刑之外或有註誤之徒爰降殊私特弘在宥瑕累咸滌危疑獲安此皆廟算弼諧致君及物事光前史功格上玄某限以守官不獲隨例拜賀無任抃躍之至大和九年十二月二十三日

上宰相賀改元赦書狀

同州狀上中書門下改元赦書右伏奉今月一日制書改大和十年爲開成元年大赦天下者伏以律首三元禮崇四始順陽和發生之德敷大號渙汗之恩宥過恤刑弛征已責盡去人瘼通知物情德音朝發於九天和氣夕周於四海此皆相公弼諧之道燮贊之功進熟於密勿之間發揚成滂沛之澤某恪守官業印綬所拘不獲隨例拜賀

薦處士嚴恣狀

處士嚴恣右左庶子損之之孫國子司業士元之子舊名保嗣亦有官班頃者李賓客渤常與之游辟爲桂州支使其後寄家汝海專靜自居某常典汝州與語甚熟歷代史及國朝故事悉能該通操心甚危觀跡相副未達知己已過壯年汨沒風塵有足悲者伏見赦文節目委州郡長吏搜訪隱淪此舉無他惟善所在每覽珠英卷後學士姓名有常州人符鳳白衣在選取其藝業不棄遠人某蚤被儒官得以薦士亦非出位冀不廢言倘弘文集賢史氏之館采其實學有勸諸生伏以桂州辟之於前某薦之於後豈必有土長吏然後事行伏惟試味斯言降意詳擇謹狀

薦處士王龜狀

處士王龜古者選公族大夫必以惇惠者教之文敏者道之果敢者諗之鎮靜者循之孜孜於此者蓋膏粱之性難正而懼公侯之胤不能嗣其耿光可以深惜然則成宣之後而老爲大夫非恥乎此智武子誠文子旣冠而見之詞也是

知古之取士不專寒族必參用世胄以廣得人之路今見處士王龜卽居守之
第三子也天性貞靜操心甚危不由門資誓志自立樂處士之號不汨綺襦之
閒自到洛都便居山寺耽玩墳籍放情煙霞曾邀與語如鋸木屑信有稟受居
然出羣以比在京師甚足知者諫院有狀名流亟言某流滯周南靜閱時輩身
雖不用心甚愛才況遇相公持衡敢有所啓誠懸之下輕重難欺伏惟深賜詳
擇知卿族之內有遺逸焉謹狀正議大夫檢校禮部尙書兼太子賓客分司東
都劉某狀

劉賓客文集卷第十七

劉賓客文集卷第十八

啓

上杜司徒啓

上淮南李相公啓

上門下武相公啓

上中書李相公啓

謝門下武相公啓

謝中書張相公啓

賀門下裴相公啓

上門下裴相公啓

賀門下李相公啓

上僕射李相公啓

謝相公裴啓

謝竇相公啓

上杜司徒啓

時謫朗州

某啓一自謫居七悲秋氣越聲長苦聽者誰哀湯網雖疏久而猶誑失意多病
衰不待年心如寒灰頭有白髮惕厲之日利於退藏是以彌年不敢奏記近本
州徐使君至奉手筆一函稱謂不移問訊加劇重復點竄一無容言忽疑此身
猶在門下收紙長想欣然感生尋省遭罹萬重不幸方寸之地自不能言求人

見諒豈復容易復蒙遠示且曰浮謗漸消況承慶宥期以振刷方今聖賢合德朝野多歡澤柔異類仁及行葦萬族咸說獨爲窮人四時平分未變寒谷自同類牽復又已三年側聞衆情或似哀歎某材略無取廢錮是宜若非舊恩孰肯留念六翮方鍛思重託於扶搖孤桐半焦冀見收於煨燼伏紙流涕不知所言謹啓

上淮南李相公啓

某啓某向以昧於周身措足危地駭機一發浮謗如川巧言奇中別白無路祝網之日漏恩者三咋舌兢魂分終裔壤豈意天未剿絕仁人登庸施一陽於剝極之際援衆溺於坎深之下南箕播物不勝曷言危心鍛翮絲是自保陰施之德已然乃聞受恩同人盟以死荅私感竊扞積於窮年化權禮絕孤志莫展今幸伍中牽復司存字下伏慮因是記其姓名謹獻詩二篇敢聞左右古之所以導下情而通比興者必文其言以表之雖吐謠俚音可儷風什伏惟降意詳擇斯大幸也謹因楊子程留後行謹奉啓不宣謹啓

上門下武相公啓

某啓去年本州吏人自蜀還後伏奉示問兼衣服繒綵等雲水路遙緘滕貺厚
恭承惠下之旨重以念舊之懷熙如陽和列在緇簡苦心多感危涕自零驚神
驛思若侍杖屨伏以聖上注意理本銳求國楨念外臺報政之功追宣室前席
之事重下丹詔再弁黃樞羣情符合和氣來應八柄所在三人同心協台坐之
精膺傑材之數談笑於規矩之際從容於陶冶之閒物皆由儀人識所措某久
懼憲網兀若枯株當萬類咸說之辰抱窮途終慟之苦清朝無絳灌之列至理
絕椒蘭之嫌此時不遇可以言命嗟乎一身主祀萬里望枌榆之鄉高堂有親
九年居蠻貊之地從坐之典固有等差同類之中又尋牽復頃在臺日獲奉準
繩指吏途於按讞道文律於章奏藻鑑之下難逃陋容炎涼載移足見真態自
違闕左右沈淪遐荒歲月滋深艱貞彌厲緬思受譴之始他人不知屬山園事
繁辱懦力竭本使有內嬖之吏供司有恃寵之臣言涉猜嫌動礙關束城社之
勢函矢紛然彌縫其閒崎嶇備盡始慮罪因事闕寧虞謗逐跡生智乏周身又

誰咎也伏以趙國公頃承一顧之重高邑公夙荷見知之深雖提挈不忘而顯白無自蓋以永貞之際皆在外方雖得傳聞莫詳本末特哀黨錮亟形話言自前歲振淹命行中止或聞輿論亦愍重傷伏遇相公秉鈞輒已自賀儻重言一發清議攸同使聖朝無錮人大冶無廢物自新之路既廣好生之德遠彰羣蟄應南山之雷窮鱗得西江之水指顧之內生成可期伏惟發膚寸之陰成彌天之澤回一瞬之念致再造之恩誠無補於多事之時庶有助於陰施之德無任懇悃之至謹啓

上中書李相公啓

某啓去年國子主簿楊歸厚致書相慶伏承相公言及廢錮愍色甚深哀仲翔之久謫恕元直之方才思振淹之道廣錫類之仁遠聆一言如受華袞伏自不窺牆仞九年於茲高卑邈殊禮數懸絕雖身居廢地而心持至公伏以相公久以訏謨參于宥密材既爲時而出道以得君而專令發於流水之源化行猶偃草之易習強伉者自納於軌物困杼軸者咸躋於仁壽六轡在手平衡居心運

思於陶冶之閒宣猷於魚水之際然能軫念廢物遠哀窮途嗟哉小生有足悲者內無手足之助外乏強近之親爲學苦心本求榮養得罪由己翻乃貽憂捫躬自劾愧入肌骨禍起飛語刑極淪胥心因病怯氣以愁耗近者否運將泰仁人持衡伏惟推曾閔之懷憐烏鳥之志處夔龍之位傷屈賈之心沛然垂光昭振幽蟄言出口吻澤濡寰區昔者行葦勿傷枯骸猶掩哀老以出幣愍窮而開懷無情異類尙或嬰慮顧惟江干逐客曾是相府故人言念材能誠無所取譬諸飛走庸或知恩嗚呼以不駐之光陰抱無涯之憂悔當可封之至理爲永廢之窮人聞弦尙驚危心不定垂耳斯久長鳴孔悲腸回淚盡言不宣意謹啓

謝門下武相公啓

某啓某一坐飛語廢錮十年昨蒙徵還重懼不幸詔命始下周章失圖吞聲咋舌顯白無路豈謂烏鳥微志惻于深仁恤然動拯溺之懷煦然存道舊之旨言念鰥鯨慰安蒼黃推以恕心期於造膝重言一發叡聽克從回陽曜於肅殺之辰沃天波於蹭蹬之際俾移善地獲奉安輿率土知孝治之源羣生識人倫之

厚感召和氣發揚皇風豈惟匹夫獨受其賜某卽以今月十一日到州上訖守
在要荒拘於印綬巾鞞詣謝有志莫從誠知微生不足酬德捐軀之外無地寄
言效節蕭屏虔然心禱無任懇悃屏營之至謹勒軍事衙官左威衛慈州吉昌
府別將員外置同正員常懇奉啓起居不宣謹啓

謝中書張相公啓

某啓某智乏周身動必招悔一坐飛語如衝駭機昨者詔書始下驚懼失次叫
闐無路擠壑是虞草木賤軀誠不足惜烏烏微志實有可哀伏蒙聖慈遽寢前
命移莅善部載形綸言凡在人臣皆感至德凡爲人子同荷至仁豈唯輒生獨
受其賜伏以相公心符上德道冠如仁一夫不獲戚見於色密旨未下數形於
言竟回三舍之光能拔九泉之厄袁公之平楚獄不忍錮人晏子之哀越石乃
伸知己所以慶垂胤祚言成春秋神理孔昭報應斯必身侔蟬翼何以受恩死
輕鴻毛固得其所卑身有限拜謝末由無任感激兢惶之至謹勒軍事衙官守
左威衛慈州吉昌府別將員外置同正員常懇奉啓起居不宣謹啓

賀門下裴相公啓

某啓伏以相公含道傑出降神挺生坐籌以弼叡謨秉鉞以行天討風雲助氣川岳效靈制勝於尊俎之閒指縱於鞞蹠之末繡斧既定袞衣以歸君心如魚水人望如風草一德交浹萬邦和平運神思於鴻鑪納生靈於壽域文武丕績冠於古今某恪守遐荒不獲隨例拜賀

上門下裴相公啓

某啓曩者淮右逋誅卽戎歲久天子齋戒以命元臣登壇之日上略前定從九天而下縱以神兵分六符之光掃其長彗授鉞於西潁之半策勳於北陸之初功成偃節復執大柄君臣相遇播於樂章山河啓封載在盟府上方注意人益具瞻因魚水之協符極夔龍之事業時屬四始恩覃萬方致君及物其德兩大古先俊賢所未備者我從容而保之殆非人事抑有幽贊夫異同之論我以獨見剖之文武之道我以全材統之崇高之位我以大功居之造物之權我以虛心運之然持盈之術古所難也實在陰施及物厚其德基以左右功庸而百祿

是荷人所欽戴久而愈宜昔袁太尉不忍錮人而楚獄衰息一言之慶子孫不承以今日將明之材行前脩博施之義筆端膚寸澤及九垓猶夫疾耕必有滯穗某頃墮危厄常受厚恩詛盟於心要之自效常懼廢死荒服永辜願言敢因賀牋一寄丹懇固非奇理不足以縈於冲襟然則利於行者固在乎常談而卓詭孤特之言未必利於行也伏惟以愚言與賢者參之謹啓

賀門下李相公啓

自西川入爲大夫拜相

某啓伏以聖君當功成愷樂之日而求賢愈切思治益深是上玄垂休欲速致太平之明效以相公事業而逢此時天下之人視仁壽之域其猶尋尺故命書所至德風隨之微材片善咸自磨拂況同主國柄如吹埴簾舍生之倫唯所措置日月停午物無邪陰聖賢合德人識正道雖居畎畝足以詠歌某邈守要荒不獲隨例拜賀私感竊抃實倍恆情

上僕射李相公啓

某啓州吏還伏蒙擺落常態手筆具書言及貞元中登朝人逮今無十輩及發

中書相公一函具道閣下亟言曩遊顏閒頗有哀色夫溝中之木與犧象同體
追琢不至坐成枯薪朱而藍之猶足爲器苟液橈曲戾不足枉斧斤願爲庭燎
以照嘉客謹啓

謝裴相公啓

某啓某遭不幸歲將二紀雖累更符竹而未出網羅親知見憐或有論薦如陷
還濘動而愈沈甘心終否無路自奮豈意天未勦絕仁人持衡紆神慮於多方
起堙沈於久廢居剝極之際一陽復生出坎深之中平路資始通籍郎位分曹
樂都喬木展舊國之思行雲有故山之戀姻族相賀壺觴盈門官無責詞始自
今日禽魚之志誓以死生草木之年惜其晼晚章程有守拜謝無由瞻望巖廊
虔然心禱謹啓

謝竇相公啓

某啓某一辭朝列二十三年雖轉郡符未離謫籍卑溼生疾衰遲鮮歡望故國
而未歸如痿人之念起昨蒙罷免甘守丘園相公不棄舊遊特哀久廢每奉華

翰賜之衷言果蒙新恩重忝清貫薦延有漸拯拔多方六律變幽谷之寒一丸
銷彌年之疹鍛翮將舉危心獲安布武夷途自此而始分曹有繫拜謝無由瞻
望德藩坐馳精爽無任感激之至謹啓

劉賓客文集卷第十八

劉賓客文集卷第十九

集紀

唐故相國李公集紀

唐故中書侍郎平章事章公集紀

唐故相國贈司空令狐公集紀

唐故尚書主客員外郎盧公集紀

唐故衡州刺史呂君集紀

唐故尚書禮部員外郎柳君集紀

董氏武陵集紀

澈上人文集紀

唐故相國李公集紀

天以正氣付偉人必飾之使光耀於世粹和綢緼積於中鏗鏘發越形乎文文之細大視道之行止故得其位者文非空言咸繫於訐謨宥密庸可不紀惟唐

以神武定天下羣慝既讐驟示以文韶英之音與鉦鼓相襲故起文章爲大臣者魏文貞以諫諍顯馬高唐以智略奮岑江陵以潤色聞無草昧汗馬之勞而任遇在功臣上唐之貴文至矣哉後王纂承多以國柄付文士元和初憲宗遵聖祖故事視有宰相器者貯之內庭繇是釋筆硯而操化權者十八九公實得時而光焉公諱絳字深之趙郡人在貢士中傑然有奇表既登太常第又以詞賦升甲科授祕書省校書郎歲滿從調有司設甲乙問以觀決斷復居高品補渭南尉擢拜監察御史未幾以本官充翰林學士居中轉尙書主客員外郎歷司勳郎中知制誥遷中書舍人風儀峻整敷奏讜切言事感動上輒目送之一旦召至浴堂門與語半日曰將移用於大位宜稔熟民隱遂出爲戶部侍郎遷中書侍郎同平章事毅然有直聲及冊免而問望益大周旋公卿閱五爲尙書歷御史大夫左僕射一以三公領太常刺近輔居保釐登齋壇皆再焉大和三
年以司空鎮南鄭居二歲坐氣剛玉折海內冤惜之後三年嗣子前京兆府尹戶曹掾琢次子前監察御史裏行頊等泣持遺草請編之肇自從試有司至於

宰天下詞賦詔誥封章啓事歌詩贈錢金石勳功凡四百餘篇勒成二十卷上所以知君臣啓沃之際下所以備風雅詩聲之義洪鐘駭聽瑤瑟清骨其在翰苑及登台庭亟言大事誠貫理直感通神祇龍鱗收怒天日回照古所謂一言興邦者信哉始愚與公爲布衣游及仕畿服幸公同邑其後雖翔泳勢異而不以名數革初心今考其文至論事疏感人肺肝毛髮皆聳嗚呼其盛唐之遺直歟

唐故中書侍郎平章事韋公集紀

漢庭以賢良文學徵有道之士公孫弘條對第一席其勢鼓行人闕取丞相且侯使漢有得人之聲伊弘發也皇唐文物與漢同風故天后朝燕國張公說以詞標文範徵玄宗朝曲江張公九齡以道侔伊呂徵德宗朝天水姜公公輔杜陵韋公執誼河東裴公均以賢良方正徵憲宗朝河南元公稹京兆韋公淳以才識兼茂徵隴西牛公僧孺李公宗閔以能直言極諫徵咸用對策甲於天下繼繼爲有聲宰相古今相望落落然如騎星辰與夫起版築飯牛者異矣公本

名淳舉進士登第賢良既仕方更名處厚字德載漢丞相扶陽侯之裔孫後周
逍遙公夙之八代孫江陵節度參謀監察御史裏行贈右僕射某之元子生而
聰明絕人在提孩發言成詩未幾能賦受經於先君僕射學文於伯舅許公孟
容及壯通六經旁貫百氏咨天人之際遂探曆數明天官窮性命之源以至於
佛書尤邃初爲集賢殿校書郎宰相李趙公監修國史引直東觀就改咸陽尉
遷右拾遺轉左補闕世稱有史才能諫諍入尚書爲郎歷禮部考功皆人望
所在上方用威武以讐不庭宿兵寢久韋丞相貫之酌人情上言不合意冊免
因歷詆所善公在位中出爲開州刺史居三年執友崔敦詩爲相徵拜戶部郎
中至闕下旬歲閒以本官知制誥穆宗新卽位注意近臣召入翰林充侍講學
士初授諫議大夫續換中書舍人侍遊蓬萊池延問大義退而進六經法言二
十篇優詔答之賜以金紫尋遷權知兵部侍郎知制誥翰林侍講史館修撰長
慶四年春敬宗踐阼以公用經術左右先帝五年稔聞其德尤所欽倚內署故
事與外廷不同凡言翰林學士必草詔書有侍講者專備顧問雖官爲中書舍

人或他官知制誥第用其班次耳不竄言於訓詞至是上器公且有以寵之乃使內謁者申命去侍講之稱慮未諭於百執事居數日降命書重舉舊官以明新意尋真拜夏官貳卿由是內庭詞臣無出其右者凡密旨必承乎權輿故號承旨學士上富春秋未親庶政或有凝滯視公如著龜寶曆季年宮壺閒一夕生變人情大駭雖鼎臣無所關決唯內署得參焉羣議闕胡貢然俟公一言而定戡難纘服再維乾綱今上繼明策勳第一擢拜中書侍郎同中書門下平章事以高材遇英主功顯人伏言無不從筆端膚寸澤及天下盡罷冗食請歸材人事先有司物止常貢城社無託巖廊益尊感恩盡瘁不嗇神用大和二年十二月上前言事未及畢詞疾作暴僨以朝服委地同列白奏搢笏扶持之不能起上命中貴人左右翼歸於中書如大醉狀上震驚咨嗟徵醫賜藥旁午疊委會莫肩輿至第詰旦以不起聞贈襚加常禮後十年嗣子蕃以太子舍人直弘文館編次遺文七十通銜哀貢誠乞詞以冠其首謹按公未爲近臣已前所著詞賦讚論記述銘志皆文士之詞也以才麗爲主自入爲學士至宰相以往

所執筆皆經綸制置財成潤色之詞也以識度爲宗觀其發德音福生人沛然如時雨襲元老諭功臣穆然如景風命相之冊和而莊命將之誥昭而毅薦賢能其氣似孔文舉論經學其博似劉子駿發十難以摧言利者其辯似管夷吾噫逢時得君奮智謀以取高位而令名隨之豈不偉哉初蕃旣纂修父書咨於先執李習之請文爲領袖許而未就一旦習之憮然謂蕃曰翱昔與韓吏部退之爲文章盟主同時倫輩惟柳儀曹宗元劉賓客夢得耳韓柳之逝久矣今翱又被病慮不能自述有孤前言齋恨無已將子薦誠於劉君乎無何習之夢奠於襄州蕃具道其語余感相國之平昔且嘉蕃之虔虔孝敬庶幾能世其家故不讓云

唐故相國贈司空令狐公集紀

起文章而陟大位丹青景化焜燿藩方如非煙祥風緣飾萬物而與令名相終始者有唐文臣令狐公實當之公名楚字殼士燉煌人今占數於長安右部天授神敏性能無師始學語言乃協宮徵故五歲以爲詩成章旣冠參貢士果有

名字時司空杜公以重德知貢舉擢居甲科琅邪王拱識公於童丱雅器重之至是拱自虞部正郎領桂州銳於部辟賢以酬不次之遇先拜章而後告公既而授試弘文館校書郎公爲人子重難遠行稟命而去居一歲竟迫方寸而歸家在并汾閒急於祿養捧從事檄於并州凡更三牧官至監察御史元和初憲宗聞其名徵拜右拾遺歷太常博士入尙書爲禮部員外郎性至孝旣孤以善居喪聞中月除刑部員外時帝女下嫁相禮闕官公以本官攝博士當問名之答上親臨帳幄簾內以窺之禮容甚偉聲氣朗徹上目送良久謂左右曰是官可用記其姓名未幾改職方知制誥詞鋒犀利絕人遠甚適有旨選司言高第者視草內庭宰臣以公爲首遂轉本司郎中充翰林學士滿歲遷中書舍人專掌內制武帳通奏柏梁陪燕嘉猷高韻冠於一時會淮右稽誅上遣丞相卽戎以督戰公草詔書詞有涉嫌者相府上言有命中書參詳竄定因罷內職歸閣中而君心眷然將有大用且出入以試之乃牧華州兼御史中丞錫以金紫居鎮七月遷大夫充河陽三城懷州節度使又七月急召抵京師拜中書侍郎同

中書門下平章事天下然後知上心倚以爲相非一朝也是歲元和十四年秋
明年正月憲宗晏駕惜其在位日淺遭時大變穆宗踐阼轉門下侍郎平章事
萬幾百度別有所付第以舊相署位充山陵使七月禮畢部下吏有以贓狀聞
者朝典用責率之義是以左授宣歙池等州都團練觀察處置使兼御史大夫
恩顧一異媒孽隨生旋又貶衡州刺史移道州轉太子賓客分司東都尋起爲
陝虢觀察使或有上封者稱前以奉陵寢不檢下獲譴今陵土猶溼未宜遽用
次陝一日重爲賓客分司長慶四年改河南尹其秋授檢校禮部尚書兼汴州
刺史充宣武軍節度管內觀察處置等使汴州爲四戰之地擇帥先有功峻刑
右武疑似沈命號爲危邦者積年公始以清儉自律以恩信待人以夷坦去羣
疑以禮讓汰慘急自上下化速於置郵泮林草音無復故態璽書勞之就加大
司馬文宗纂服三年冬上表以大臣未識天子願朝正月制曰可操節入覲遷
戶部尚書俄爲東都留守又轉檢校尚書右僕射兼鄆州刺史天平軍節度使
後以王業之始實爲北京移鎮太原從人望也以吏部尚書徵續換太常卿真

拜尚書左僕射大和九年冬十一月京師有急兵起上方御正殿即日還宮是夕召公決事禁中以見賢編反事傳古義爲對其詞讜切無所顧望上心嘉之居

一二日守本官兼諸道鹽鐵轉運使以幹利權既非素尚乞乞牢讓故復爲檢

校左僕射興元尹山南西道節度觀察使兼御史大夫開成二年十一月十二

日薨於漢中官舍享年七十齊終之前一日自脩遺表初述感恩陳力之大義

中及朝廷刑政之或闕意切言盡神識不昏上深悼之形於愍冊未登三事故

以贈之歸全之夕有大星殞於正寢之上光燭於庭天意若曰旣稟之而生亦

有涯而落其文章貴壽之氣燄歟初憲宗覽國書見五王復辟之際狄梁公實

尸之公爲臺臣獨召便殿問曰仁傑有後乎公以其支孫試校書郎兼善爲對

卽日拜左拾遺公遂草制他日相銜者因挾其詞以爲非春秋諱魯之旨穆宗

新卽位謙讓不自決遂有衡州之貶公議冤之嗟乎天之於賦予也甚嗇而難

周公獨賦文華丁良時歷名卿至元老蓋忠廉孝友愛才與物合是粹美以將

之邪可謂全德矣旣免喪嗣子左補闕緬集公之文成一百三十卷因長子太

子左諭德弘分司東都負其笥來謁泣白先正司空與丈人爲顯交撤懸之前五日所賦詩寄友非他人也今手澤尙存言之嗚咽長號予爲之慟收淚而視分當編次之始公參大鹵記室以文雄於邊議者謂一方不足以騁用徵拜於朝累遷儀曹郎乃登西掖入內署訐謨密勿遂委軀柄斯以文雄於國也嗚呼咫尺之管文敏者執而運之所如皆合在藩聳萬夫之觀望立朝賁羣寮之頰舌居內成大政之風霆導吠澮於章奏鼓洪瀾於訓誥筆端膚寸膏潤天下文章之用極其至矣而又餘力工於篇什古文士所難兼焉晉王珣爲晉僕射夢人授大筆如椽覺而謂人曰此必有大手筆事後孝武哀冊文乃珣之詞也公爲宰相奉詔撰憲宗聖神章武孝皇帝哀冊文時稱乾陵崔文公之比今考之而信故以爲首冠尊重事也其他各以類聚著於篇

唐故尙書主客員外郎盧公集紀

心之精微發而爲文文之神妙詠而爲詩猶夫孤桐朗玉自有天律能事具者其名必高名由實生故久而益大尙書郎盧公諱象字緯卿始以章句振起於

開元中與王維崔顥比肩驤首鼓行於時妍詞一發樂府傳貴由前進士補祕書省校書郎轉右衛倉曹掾丞相曲江公方執文衡揣摩後進得公深器之擢爲左補闕河南府司錄司勳員外郎名盛氣高少所卑下爲飛語所中左遷齊汾鄭三郡司馬入爲膳部員外郎時大盜起幽陵入洛師東夏衣冠不克歸王所爲虜劫執公墮脅從伍中初謫果州長史又貶永州司戶移吉州長史天下無事朝廷思用宿舊徵拜主客員外郎道病留武昌遂不起故相崔太傅時爲右史方在鄂以文誌其墓其一詞曰噫公妙年有聲振耀當代翱翔雲路不虞則層贈反燉盛名先物易生癘疵三至郎署坐成遺棄蹭蹬江皋棲棲沒齒見知者恨之公遠祖元魏北齊後周皆爲帝師公之叔父嵩山逸人諫議大夫顥然真隱者也公下世後七十三年其孫元符捧遺草來乞詞以表之嘗經亂離多散落今之存者十有二卷凡若干篇

唐故衡州刺史呂君集紀

五行秀氣得之居多者爲俊人其色皦灑於顏閒其聲發而爲文章天之所與

有物來相彼由學而致者如工人染夏以視羽畎有生死之殊矣初貞元中天子之文章煥乎垂光慶霄在上萬物五色天下文人爲氣所召其生乃蕃靈芝萑莆與百果齊坼然煌煌翹翹出乎其類終爲偉人者幾希矣東平呂和叔實生是時而絕人遠甚始以文學震三川三川守以爲貢士之冠名聲四馳速如羽檄長安中諸生咸避其鋒兩科連中芒刃愈出德宗聞其名自集賢殿校書郎擢爲左拾遺明年大戎請和上問能使絕域者君以奇表有專對材膺選轉殿內使錫之銀章還拜尚書戶部員外郎轉司封遷刑部郎中兼侍御史副治書之職會中執法左遷緣坐道州刺史以政聞改衡州年四十而沒後十年其子安衡泣捧遺草來謁咨余紬之成一家言凡二百篇和叔名温別字化老祖考皆以文學至大官蚤聞詩禮於先侍郎又師吳郡陸贄通春秋從梁肅學文章勇於六藝之能咸有所祖年益壯志益大遂撥去文學與雋賢交重氣概覈名實敢然以致君及物爲大欲每與其徒講疑考要王霸富彊之術臣子忠孝之道出入上下百千年閱詆訶角逐疊發連注得一善輒盱衡擊節揚袂頓足

信容德色舞於眉端以爲按是言循是理合於心而氣將之昭昭然若揭日月而行孰能闕其勢而爭光者乎嗚呼言可信而時異道甚長而命窄精氣爲物其有所歸乎古之爲書者先立言而後體物賈生之書首過秦而荀卿亦後其賦和叔年少遇君而卒以謫似賈生能明王道似荀卿故余所先後視二書斷自人文化成論至諸葛武侯廟記爲上篇其他咸有爲而爲之始學左氏書故其文微爲富豔夫羿之關弓唯巴蛇九日乃能盡其殼而回注鸚爵亦要失中於尋常之閒非羿之手弓有能有不能所遇然也後之達解者推而廣之知余之素交不相索於文字之內而已

唐故尚書禮部員外郎柳君集紀

八音與政通而文章與時高下三代之文至戰國而病涉秦漢復起漢之文至列國而病唐興復起夫政靡而土裂三光五嶽之氣分

扶問反

大音又完故必混

一而後大振初貞元中上方嚮文章昭回之光下飾萬物天下文士爭執所長與時而奮粲焉如繁星麗天而芒寒色正人望而敬者五行而已河東柳子厚

斯人望而敬者歟子厚始以童子有奇名於貞元初至九年爲名進士十有九年爲材御史二十有一年以文章稱首入尙書爲禮部員外郎是歲以疏雋少檢獲訕出牧邵州又謫佐永州居十年詔書徵不用遂爲柳州刺史五歲不得召病且革留書抵其友中山劉某曰我不幸卒以謫死以遺草累故人某執書以泣遂編次爲三十通行於世子厚之喪昌黎韓退之誌其墓且以書來弔曰哀哉若人之不淑吾嘗評其文雄深雅健似司馬子長崔蔡不足多也安定皇甫湜於文章少所推讓亦以退之之言爲然凡子厚名氏與仕與年暨行己之大方有退之之誌若祭文在今附於第一通之末云

董氏武陵集紀

片言可以明百意坐馳可以役萬里工於詩者能之風雅體變而與同古今調殊而理異達於詩者能之工生於才達生於明二者還相爲用而後詩道備矣余嘗執斯評爲公是且衡而度之誠懸乎心默揣羣才鈞銖尋尺隨限而盡如是所閱者百態一旦得董生之詞杳如搏翠屏浮層瀾視聽所遇非風塵間物

亦猶明金粹羽得於遐裔雖欲勿寶可乎生名侏字庶中幼嗜屬詩晚而不衰

心源爲鑪筆端爲炭鍛鍊元本雕礪羣形糾紛舛錯逐意奔走因故沿濁協爲

新聲嘗所與游者皆青雲之士聞名如盧杜盧員外象杜員外甫高韻如包李包祭酒佶李侍郎紆

迭以章句揚於當時末路寡徒值余歡甚因相謂曰閒者以廷尉屬爲荊州從

事移疾罷去幽臥於武陵迨今四年言未信於世道不施於人寓其情懷播爲

吟咏時復發笥紛然盈前凡五十篇因地爲目吾子嘗號知我盍表而志之爲

生羽翼余不得讓而著於篇因系之曰詩者其文章之蘊耶義得而言喪故微

而難能境生於象外故精而寡和千里之繆不容秋毫非有的然之姿可使戶

曉必俟知者然後鼓行於時自建安距永明已還詞人比肩唱和相發有以朔

風零雨高視天下蟬噪鳥鳴蔚在史策國朝因之粲然復興由篇章以躋貴仕

者相踵而起兵興已還右武尙功公卿大夫以憂濟爲任不暇器人於文什之

閒故其風寢息樂府協律不能足去聲新詞以度曲夜諷之職寂寥無紀則董生

之貧臥於齋土也其不得於時者歟其不試故藝者歟

澈上人文集紀

珍做宋版印

釋子工爲詩尙矣休上人賦別怨約法師哭范尙書咸爲當時才士之所傾歎厥後比比有之上人生於會稽本湯氏子聰察嗜學不肯爲凡夫因辭父兄出家號靈澈字源澄雖受經論一心好篇章從越客嚴維學爲詩遂籍籍有聞去聲

維卒乃抵吳興與長老詩僧皎然游講藝益至皎然以書薦於詞人包侍郎佶包得之大喜又以書致於李侍郎紆是以文章風韻主盟於世者曰包李以是上人之名由二公而颺如雲得風柯葉張王以文章接才子以禪理說高人風議甚雅談笑多味貞元中西遊京師名振輦下緇流疾之造飛語激動中貴人因侵誣得罪徙汀州會赦歸東越時吳楚閒諸侯多賓禮招延之元和十一年終於宣州開元寺七十有一門人遷之建塔於越之山陰天柱峯之陁從本教也初上人在吳興居何山與晝公爲侶皎然字晝時以字行時予方以兩髦執筆硯陪其吟詠皆曰孺子可教後相遇於京洛與支許之契焉上人沒後十七年予爲吳郡其門人秀峰捧先師之文來乞詞以志且曰師嘗在吳賦詩僅二千首今刪

取三百篇勒爲十卷自大曆至元和凡五十年間接詞客聞人唱和酬別爲十卷今也思行乎昭世求一言羽翼之因爲評曰世之言詩僧多出江左靈一導其源護國襲之清江揚其波法振沿之如么絃孤韻警入人耳非大樂之音獨吳興晝公能備衆體晝公後澈公承之至如芙蓉園新寺詩云經來白馬寺僧到赤烏年謫汀州云青蠅爲弔客黃耳寄家書可謂入作者閩域豈特雄於詩僧闕邪

劉賓客文集卷第十九

卷之六

...

...

...

...

...

...

...

...

...

...

...

劉賓客文集卷第二十

雜著

傷我馬詞

口兵戒

猶子蔚適越戒

觀博

觀市

論書

劉氏集略說

名子說

奏記丞相府論學事

澤宮詩

魏生兵要述

救沈志

傷我馬詞

馬龍類蓋健而善馳君子之所宜求爲豐也故法求於力或逸而善駭法求於和或乾而易仆由德稱者鮮焉曩予知善馬之難遭也不求於肆而於其鄉一旦果得陰山之阿蠖略其形蕭蕭其鳴長顧遠視順而能力顧其軀非騫然而偉也雖士得以乘之始予被皁衣於朝朝之人多四三其牡以送馭予無兼焉

水轍之淋灑淖途之汪洋結爲确塋融爲坳堂前有僨軼後有濡裳我策垂空
我鑣方揚振鬣軒昂矯如飛翔翹翹其雄也非力而何烈火之具舉鉤膺之疊
舞一蹊千趾駢比齟齬瘡者斯擠悍者斯怒我鞍如山我轡如組弭毛容與宛
若孤處靡靡其柔也非慧而何前日子之獲謹於闕下背商顏趨昭丘日中而
踰舍修門之南非騎所宜夷則沮洳高則嶽巘虎跑空林鷺鬪荒墟風雨孤征
簡書之威俾予弗顛我馬焉依屑屑其勞也非德而何予至武陵居沅水之傍
或踰月未嘗跨焉以故莫得伸其所長跼踖顧望兮頓其鎖韁飲齧日削兮精
耗神傷寒櫪騷騷兮瘁毛蒼涼路聞躑躅兮逸氣騰驤朔雲深兮邊草遠意欲
往兮聲不揚隕然似不得其所而死故其嗟也兼常初玄宗羈大宛而盡有名
馬命典牧以時起居洎西幸蜀往往民閱得其種而蕃焉故良毛色者率非中
土類也稽是毛物豈祖於宛歟漢之歌曰龍爲友武陵有水曰龍泉遂歸骨於
是川且弔之曰生於磧礧善馳走萬里南來困丘阜青菰寒菽非適口病聞北
風猶舉首金壺已平骨空朽投之龍淵從爾友

口兵戒

余讀蒙莊書曰兵莫慘於志莫邪爲下缺然知志士之傷夫生也他日讀遠祖中壘校尉書曰口者兵也盡然知言之爲兵又慘乎志因博考前載極其兩端夫志兵之薄人激烈抗憤不過無從容於世耳口兵之起其刑渥焉繇是知吾祖之言爲急作戒以書於盤盂五刃之傷藥之可平一言成痾智不能明人或懼兵道塗奔救投方效技思恐其後人或懼譖比肩狐疑借有解紛毀輒隨之故曰舌端之孽慘乎楚鐵夷竈誠謀執戈以驅掩人誠智折筭以詈賢者誨子信有其旨發言之難伸舌猶爾辯爲詐媒默爲德基玉櫝不啓孰能瑕疵犖麋深居孰謂可嗤戒哉我口之啓爾心之門無爲我兵當爲我藩以慎爲鍵以忍爲闔可以多食勿以多言

猶子蔚適越戒

猶子蔚晨跪於席端曰臣幼承叔父訓始句萌至於扶疏前日不自意有司以名汗賢能書又不自意被丞相府召爲從事重兢累媿懼貽叔父羞今當行乞

辭以爲戒余曰若知彝器乎始乎斲輪因入規矩剗中廉外枵然而有容者理

膩質堅然後如密石焉風戾日晞不副不聲五文反然後青黃之鳥獸之飾乎瑤

金貴在清廟其用也曩以養潔其藏也櫝以養光苟措非其所一有毫髮之傷

儻然與破甑爲伍矣汝之始成人猶器之作朴是宜力學爲龔斲親賢爲青黃

睦僚友爲瑤金忠所奉爲清廟盡敬以爲曩慎微以爲櫝去怠以護傷在勤而

行之耳設有人思披重霄而挹顛氣病無階而升有力者揭層梯而倚泰山然

而一舉足而一高非獨揭梯者所能也凡天位未嘗曠故世多貴人唯天爵并

者乃可偉耳夫偉人之一顧踰乎華章而一非亦慘乎黥刑行矣慎諸吾見垂

天之雲在爾肩腋閒矣昔吾友柳儀曹嘗謂吾文雋而膏味無窮而炙愈出也

遲汝到丞相府居一二日袖吾文入謁以取質焉丞相吾友也汝事所從如事

諸父借有不如意推起敬之心以奉焉無忽

觀博

客有以博戲自任者速余觀焉初主人執握槊之器寘於廡下曰主進者要約

之既揖讓卽次有博齒二異乎古之齒其制用骨觚稜四均鏤以朱墨耦而合數取應期月視其轉止依以爭道是制也通行之久矣莫詳所祖以其用必投擲故以博投詔之是日客抵骨於局且祝之曰其來如趨其去如脫事先趨起命中無蹉跌無從彼呼無戾我恆分曹適迫自朝至於日中稷稷具也穀梁傳而率與所祝異焉客視骨如有情焉如或馮焉悉詈之不泄又從而齧齧蹂躪之莫顧其十目之哈讓也乃曰非子術之不工是朽骸者不予畀也請刷恥於弈棋主人云從命命燭以續驚神默計巧竭智匱主進者書勝負之數於牘視其所喪又倍前籍焉觀者曰以夫人之褊心亦將諾棋而抵枰矣旣乃恬而不恤赧然有失鵠求身之色人咸異之子劉子曰先人者制人博投是已從人制於人枯棋是已二者豈有數存乎其閒哉但處之勢異耳是知當軸者易生嫌而退身者易爲譽易生之嫌不足貶也易爲之譽不足多也在辨其所處而已

觀市

由命士已上不入於市周禮有焉乃今觀之蓋有因也元和二年沅南不雨自

季春至於六月毛澤將盡郡守有志於民誠信而零遂徧山川方社又不雨遂遷市於城門之遠余得自麗譙而俯焉肇下令之日布市籍者咸至夾軌道而分次焉其左右前後班閒錯峙如在闐之制其列題區榜揭價名物參外夷之貨焉馬牛有繹私屬有閑在中笥者織文及素焉在几閣者彫形及質焉在筐筥者白黑巨細焉業於饗者列饗饅陳餅餌而苾然業於酒者舉酒旗條楮盃而澤然鼓刀之人設膏俎解豕羊而赫然華實之毛畋漁之生交蜚走錯水陸羣狀夥名入隊而分韞藏而待價者負挈而求沽者乘射其時者奇贏以游者坐賈顛顛行賈遑遑利心中驚貪目不瞬於是質劑之曹較估之倫合彼此而騰躍之冒良苦之巧言數量衡於險手秒忽之差鼓舌僇傳詆欺相高詭態橫出鼓囂譁盆煙埃奮羶腥疊巾屨嚙而合之異致同歸雞鳴而爭赴日中而駢闐萬足一心恐入我先交易而退陽光西徂幅員不移徑術如初中無求隙地俱唯守犬烏烏樂得腐餘是日倚衡而閱之感其盈虛之相尋也速故著於篇

云

論書

或問曰書足以記姓名而已工與拙可損益於數哉答曰此誠有之蓋舉下之說爾非中道之說亦猶言居室曰避燥溼而已言衣裳曰適寒燠而已言飲食曰充腹而已言車馬曰代勞而已言祿位曰代耕而已今夫考居室必以閔門豐屋爲美筭衣裳必以文章適澤爲甲評飲食必以精良海陸爲貴第車馬必以華輶絕足爲高干祿位必以重侯累封爲意是數者皆不行舉下之說奚獨於書也行之邪禮曰士依於德游於藝德者何曰至曰敏曰孝之謂藝者何禮樂射御書數之謂是則藝居三德之後而士必游之也書居數之上而六藝之一也語曰飽食終日無所用心難矣哉不有博奕者乎爲之猶賢乎已是則博奕不得列於藝差愈於飽食無所用心耳吾觀今之人適有面詆之曰子書居下品矣其人必適爾而笑或誓然不屑詆之曰子握槊奕棋居下品矣其人必赧然而媿或艷然而色是故敢以六藝斥人不敢以六博斥人嗟乎衆尙之移人也問者曰然則彼魏晉宋齊閒亦嘗尙斯藝矣至有君臣爭名父子不讓何

哉答曰吾姑欲求中道耳子寧以尙之之弊規我歟且夫信者美德也秦繆尙之而賢臣莫贖黃老者至道也竇后尙之而儒臣見刑道德且不可尙矧由道德以下者哉所謂中道而言書者何處之文學之下六博之上材鈞而善者得以加譽遇一作過鈞而善者得以議能所加在乎譽非實也不贖於賞所議在乎過非實也不紊於刑夫如是庶乎六書之學不湮墜而已乎

劉氏集略說

子劉子曰五達之井百汲而盈科未必涼而甘所處之勢然也人之詞待扣而揚猶井之利汲耳始余爲童兒居江湖閒喜與屬詞者游謬以爲可教視長者所行止必操觚從之及冠舉秀才一幸而中說有司懼不厭於衆亟以口譽之長安中多循空言以爲誠果有名字益與曹輩畋漁於書林宵語途話琴酒調謔一出於文章俄被召爲記室參軍會出師淮上恆磨墨於楯鼻上或寢止羣書中居一二歲由甸服升諸朝凡三進班而所掌猶外府或官課或爲人所倩昌言奏記移讓告諭奠神志葬或猥并焉及謫於沅湘閒爲江山風物之所蕩

往往指事成歌詩或讀書有所感輒立評議窮愁著書古儒者之大同非高冠長劍之比耳前年蒙恩澤以郡符居海壖多雨慝作適晴喜躬曬書於庭得以書四十通道爾自哂曰道不加益焉用是空文爲真可供醬蒙藥楮耳他日子增博陵崔生關言曰某也曷游京師偉人多問丈人新書幾何且欲取去而某應曰無有輒媿起於顏闕今當復西期有以弭媿者繇是刪取四之一爲集略以貽此郎非敢行乎遠也

名子說

魏司空王昶名子制誼咸得立身之要前史是之然則書紳銘器孰若發言必稱之乎今余名爾長子曰咸允字信臣次曰同廩字敬臣欲爾於人無賢愚於事無小大咸推以信同施以敬俾物從而衆說其庶幾乎夫忠孝之於人如食與衣不可斯須離也豈俟余勸哉仁義道德非訓所及可勉而企者故存乎名夫朋友字之非吾職也顧名旨所在遂從而釋之孝始於事親終於事君偕曰臣知終也

奏記丞相府論學事

十一月七日使持節都督夔州諸軍事夔州刺史劉某謹奏記相公閣下凡今能言者皆謂天下少士而不知養材之道鬱堙而不揚非天不生材也亦猶不耕者而數廩庾之無餘非地不產百穀也伏以貞觀中增築學舍千二百區生徒三千餘人時外夷上疏請遣子弟入附於三雖者五國雖菁菁者莪育材之道不足比也今之膠庠不聞弦歌而室廬圯廢生徒衰少非學官不能振舉也病無貲財以給其用餼生今日一見使太學立富幸遇相公在位可以索言之禮云凡學官春釋奠於其先師斯禮止於辟廱類宮非及天下也今四海郡縣咸以春秋上丁有事孔子廟其禮不應於古且非孔子意也炎漢初定羣臣皆起屠販爲公卿故孝惠高后之閒置原廟於郡國逮孝元時韋玄成以碩儒爲丞相遂建議罷之夫以子孫尙不敢違禮以饗其祖況後學師先聖之道而首違之乎祭義曰祭不欲數語云祭神如神在與其煩於舊饗孰若行其教道今夫子之教日頽靡而以非禮之祀媚之斯儒者所宜憤悱也竊觀歷代無有是

事皇家武德二年詔於國學立周公孔子廟四時致祭貞觀十一年又詔修宣
尼廟於兗州至二十年許敬宗等奏乃遣天下諸州縣置三獻官其他如方社
敬宗非通儒不能稽典禮開元中文宗嚮學與儒臣議繇是發德音其罷郡縣
釋奠牲牢唯酒脯以薦後數年令定時王孫林甫爲宰相不涉學委御史中丞
王敬從刊之敬從非文儒遂以明衣牲牢編在學令是首失於敬宗而終失於
林甫習以爲常罕有敢非之者謹按本州四縣一歲失奠物之直緡錢十六萬
有奇舉天下之郡縣當千七百不啻羈縻者不在數中凡歲中所出於經費過
四千萬適資三獻官飾衣裳飽妻子而已於尙學之道無有補焉前日詔書許
列郡守臣得以上言便事今謹條奏某乞下禮官博士詳議典制罷天下縣邑
牲牢衣幣如有生徒春秋依開元敕旨用酒醴脍脩踞臚榛栗示敬其事而州
府許如故儀然後籍其資半附益所隸州使增學校其半率歸國庠猶不下萬
計築學室器具用豐簞食增掌固以備使令凡儒官各加稍食其紙筆鉛黃視
所出州率令折入學徒旣備明經日課繕書若干紙進士命讎校亦如之則貞

觀之風粲然不殊其他郡國皆立程督投紱懷璽械樸菁莪良可詠矣伏惟相公發迹咸自諸生其尊素王之道儀刑四方宜在今日是以小生敢沿故事以奏記於左右姑舉其大較至於證據纖悉條奏具之章下之日乞留神省察不勝大願惶恐拜手稽首

澤宮詩

澤宮送士歲貢也晉昌唐如晦以信誼為良弓文學為敢矢規爵祿猶眾禽密穀持滿遡風蜚繳者數矣有措梧之妙而無雙鶻之獲韞弓收視歸究其術絲是跡愈屈而名愈聞君子益多之彼不由其術一幸而中者雖懸貺在庭君子未嘗多也歲殫矣告予以西予為賦澤宮一章庶見子之弓弗再張也已秩秩澤宮有的維鵠祁祁庶士於以干祿彼鵠斯微若止若翔千里之差起於毫芒我矢既直我弓既良依於高墉因我不臧高墉伊何維器與時視之以心誰謂鵠微

魏生兵要述

余爲書殿學士四年所與居皆鴻生彥士一旦詔下懷吳郡章而東門下生感惜是行且曰吳中富士必有知書宜爲太守所禮者及下車閱客籍森然三千有鉅鹿魏生持所著書來謁曰不佞始讀書爲文章凡二十年在貢士中孤鳴甚哀卒無善聽者退而收視易慮伏北窗下考前言成兵要十編度諸侯未遑是事將笈而西求一言以生羽翼予取書觀之始自黃帝伏蚩尤至於隋氏平江南語春秋戰國事最備磅礴下上數千年閱其攬撫評議無遺策用是以干握兵符貴人宜有虛己而樂聞者子盍行乎吾知元上舍不獨善雞鳴彈長鋏三五九九之伎顛之而已

救沈志

貞元季年夏大水熊武五溪鬪決於沅突舊防毀民家躋高望之溟滓葩華山腹爲坻林端如莎湍道駛悍不風而怒嶺疑前邁浸淫旁掩柔者靡之固者脫之規者旋環之矩者倒顛之輕而泛浮者硯磕之重而高大者前卻之生者力音殪者弛形蔽流而東若木梯然有僧愀然焉誓於路曰浮圖之慈悲救生最

大能援彼於溺我當爲魁里中兒願從四三輩皆狎川勇游者相與乘堅舟挾善器維以修紮杙於崇丘水當洄洑人易實力凝矐執用俟可而拯大凡室處之類穴居之彙在牧之羣在豢之馴上羅黔首下逮毛物拔乎洪瀾致諸生地者數十百焉適有擊獸如鴟夷而前攫持流楫首用不陷隅目傍晚其姿弭然甚如六擾之附人者其徒將取焉僧趣音促訶之曰第無濟是爲目之可里所而不能有所持矣舟中之人曰吾聞浮圖之教貴空空生普普生慈不求報施之謂空不擇善惡之謂普不逆困窮之謂慈鄉也生必救而今也窮見廢無乃計善惡而忘普與慈乎僧曰甚矣問之迷且妄也吾之教惡乎無善惡哉六塵者在身之不善也佛以賊視之末伽聲聞者在彼之未寤也佛以邪目之惡乎無善惡邪吾鄉也所援而出死地者衆矣形乾氣還各復本狀蹄者躑躅然羽者翹蕭然而言者譏譏然隨其所之吾不尸其施也不德吾則已焉能害爲彼形之乾髮髻之姿也彼氣之還暴悖之用也心足反噬而齒甘最靈是必肉吾屬矣庸能躑躅譏譏之比歟夫虎之不可使知恩猶人之不可使爲虎也非吾自

貽患爲爾且將貽患於衆多吾罪大矣子劉子曰余聞善人在患不救不祥惡人在位不去亦不祥僧之言遠矣故志之

劉賓客文集卷第二十

劉賓客文集卷第二十一

雜興三十一首

學阮公體三首

少年負志氣信道不從時只言繩自直安知室可欺百勝慮無敵三折乃良醫
人生不失意焉能暴己知

朔風悲老驥秋霜動鷺禽出門有遠道平野多層陰滅沒馳絕塞振迅拂華林
不因感衰節安能激壯心

昔賢多使氣憂國不謀身目覽千載事心交上古人侯門有仁義靈臺多苦辛
不學腰如磬徒使甑生塵

偶作二首

終朝對尊酒嗜興非嗜甘終日偶衆人縱言不縱談世情閑盡見藥性病多諧
寄謝嵇中散予無甚不堪

萬卷堆牀書學者識其真萬里長江水征夫渡要津養生非但藥悟佛不因人

燕石何須辨逢時卽至珍

古調二首

一作
調古

軒后初冠冕前旒爲蔽明安知從復道然後見人情
簿領乃俗士清談信古風吾觀蘇令綽朱墨一何工

寓興二首

常談卽至理安事非常情寄語何平叔無爲輕老生
世途多禮數鵬鷗各逍遙何事陶彭澤拋官爲折腰

昏鏡詞并引

鏡之工列十鏡於賈奩發奩而視其一皎如其九霧如或曰良苦之不侔甚矣
工解頤謝曰非不能盡良也蓋賈之意唯售是念今來市者必歷鑿周睭求與
己宜彼皎者不能隱芒秒之瑕非美容不合是用什一其數也予感之作昏鏡

詞

昏鏡非美金漠然喪其晶陋容多自欺謂若他鏡明瑕疵既不見妍態隨意生

一日四五照自言美傾城飾帶以紋繡裝匣以瓊瑛秦宮豈不重非適乃爲輕

養鷺詞 并引

途逢少年志在逐絕方呼鷹隼以襲飛走因縱觀之卒無所獲行人有常從事於斯者曰夫鷺禽飢則爲用今哺之過篤故然也余感之作養鷺詞

養鷺非玩形所資擊鮮力少年味其理日月哺不息探雞網黃口且莫有餘食寧知下韝時翅重飛不得稽颡上林表狡兔自南北飲啄既已盈安能勞羽翼

武夫詞 并引

有武夫過詫余以從軍之樂翌日質於通武之善經者則曰果有樂也夫威恣而賞勞則樂用威雌而賞疏則樂橫去聲顧其樂安出耳余惕然作是詞

武夫何泯泯衣紫襲絳裳借問胡爲爾列校在鷹揚依倚將軍勢交結少年場探丸害公吏袖刃妒名倡家產既不事顧眄自生光酣歌高樓上袒裼大道傍昔爲編戶人秉耒甘哺糠今來從軍樂躍馬飴膏梁猶思風塵起無種取侯王

賈客詞 并引

五方之賈以財相雄而鹽賈尤熾或曰賈雄則農傷余感之作是詞

賈客無定遊所遊唯利并眩俗雜良苦乘時取重輕心計析秋毫捶鉤侷懸衡
錐刀既無棄轉化日已盈徼福禱波神施財遊化城妻約雕金釧女垂貫珠纓
高資比封君奇貨通倖卿趨時驚鳥思藏錐盤龍形大扁浮通川高樓次旗亭
行止皆有樂關梁自無征農夫何爲者辛苦事寒耕

調瑟詞

并引

里有富豪翁厚自奉養而嚴督臧獲力屈形削然猶役之無藝極一旦不堪命
亡者過半追亡者亦不來復翁頽沮而追昨非之莫及也余感之作調瑟詞
調瑟在張弦弦平音自足朱絲二十五闕一不成曲美人愛高張瑤軫再三促
上弦雖獨響下應不相屬日莫聲未和寂寥一枯木卻顧膝上弦流淚難相續

讀張曲江集作

并引

世稱張曲江爲相建言放臣不宜與善地多徙五溪不毛之鄉及今讀其文自
內職牧始安有瘴癘之歎自退相守荆門有拘囚之思託諷禽鳥寄詞草樹鬱

然與騷人同風嗟夫身出於遐陬一失意而不能堪矧華人士族而必致醜地
然後快意哉議者以曲江爲良臣識胡雛有反相羞凡器與同列密啓廷爭雖
古哲人不及而燕翼無似終爲餒魂豈伎心失怨陰謫最大雖二美莫贖邪不
然何袁公一言明楚獄而鍾社四葉以是相較神可誣乎余讀其文因爲詩以
弔

聖言貴忠恕至道重觀身法在何所恨色相斯爲仁良時難久恃陰謫豈無因
寂寞韶陽廟魂歸不見人

庭梅詠寄人

蚤花常犯寒繁實常苦酸何事上春日坐令芳意闌天桃定相笑遊妓肯回看
君問調金鼎方知正味難

詠古二首有所寄

車音想麟麟不見綦下塵可憐平陽第歌舞嬌青春金屋容色在文園詞賦新
一朝復得幸應知失意人

寂寥照鏡臺遺基古南陽真人昔來遊翠鳳相隨翔目成在桑野志遂貯椒房
豈無三千女初心不可忘

詠史二首

驃騎非無勢少卿終不去世道劇頽波我心如砥柱

賈生明王道衛綰工車戲同遇漢文時何人居貴位

苦雨行

悠悠飛走情同樂在陽和歲中三百日常恐風雨多天人信遐遠時節易蹉跎

洞房有明燭無乃酣且歌

萋兮吟

天涯浮雲生爭蔽日月光窮巷秋風起先摧蘭蕙芳萬貨列旗亭恣心注明璫
名高毀所集言巧智難防多謂行大道斯須成太行莫吟萋兮什徒使君子傷

經檀道濟故壘

萬里長城壞荒營野草秋秣陵多士女猶唱白符鳩

史云當時人歌曰可憐白符鳩枉殺檀江州

題敬器圖

秦國功成思稅駕晉臣名遂歎危機無因上蔡牽黃犬願作丹徒一布衣

聚蚊謠

沈沈夏夜閑堂開飛蚊伺暗聲如雷嘈然歛起初駭聽殷殷若自南山來喧騰
鼓舞喜昏黑昧者不分聰者惑露花滴瀝月上天利觜迎人看得我軀七尺
爾如芒我孤爾衆能我傷天生有時不可遏爲爾設幄潛匡牀清商一來秋日
曉羞爾微形飼丹鳥

百舌吟

曉星寥落春雲低初聞百舌闕啼花柳滿空迷處所搖動繁英墜紅雨笙簧
百轉音韻多黃鸝吞聲燕無語東方朝日遲遲升迎風弄景如自矜數聲不盡
又飛去何許相逢綠楊路繇蠻宛轉似娛人一心百舌何紛紛酡顏俠少停歌
聽墜珥妖姬和睡聞可憐光景何時盡誰能低回避鷹隼廷尉張羅自不關潘
郎挾彈無情損天生羽族爾何微舌端萬變乘春輝南方朱鳥一朝見索寞無

言高下飛

飛鳶操

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭聳劃聲相似
長空悠悠霽日懸
六翮不動凝飛煙
遊鶻翔雁出其下
慶雲清景相回旋
忽聞飢鳥一噪聚
瞥下雲中爭腐鼠
騰音礪吻相喧呼
仰天大嚇慘鴛雛
畏人避犬投高處
俛吻無聲猶屢顧
青鳥自愛玉山禾
仙禽徒貴華亭露
樸遯危巢向莫時
稭穗飽腹蹲枯枝
遊童挾彈一麾肘
臆碎羽分人不悲
天生衆禽各有類
威鳳文章在仁義
鷹隼儀形螻蟻心
雖能戾天何足貴

秋螢引

漢陵秦苑遙蒼蒼
陳根腐葉秋螢光
夜空寥寂金氣淨
千門九陌飛悠揚
紛綸暉映互明滅
金鑪星噴鐙花發
露華洗濯清風吹
攢昂不定招搖垂
高麗眾恩過珠網
斜歷璇題舞羅幌
曝衣樓上拂香帟
承露臺前轉仙掌
槐市諸生夜對書
北窗分明辨魯魚
行子東山起征思
中郎騎省悲秋氣
銅雀人歸自入簾
長

門帳開來照淚誰言向晦常自明童兒走步嬌女爭天生有光非自銜遠近低昂暗中見撮蚊祆鳥亦夜飛翅如車輪人不見

華山歌

洪鑪作高山元氣鼓其橐俄然神功就峻拔在寥廓靈蹤露指爪殺氣見稜角凡木不敢生神仙聿來託天資帝王宅以我爲關鑰能令下國人一見換神骨高山固無限如此方爲嶽丈夫無特達雖貴猶碌碌

摩鏡篇

流塵翳明鏡歲久看如漆門前負局生爲我一摩拂革開綠池滿暈盡金波溢白日照空心圓光走幽室山神祆氣沮野魅真形出卻思未摩時瓦礫來唐突

有獺吟

有獺得嘉魚自謂天見憐先祭不見食捧鱗望清玄人立寒沙上心專脰著肩漁翁以爲妖舉塊投其前呼兒貫魚歸與獺同烹煎關關黃金鶉煙翅搖江煙下見盈尋魚投身擘洪漣攫拏隱鱗去哺雛林岳巔鴟鳥知伺隙遙噪莫非前

